

蘭  
臺  
奏  
疏

舊



叢書集成



商務印書館發行





蘭 臺 奏 疏





本館據畿輔叢書  
本排印初編各叢  
書僅有此本

蘭臺奏疏



蘭臺奏疏目錄

卷一

擬崇實學務實政核實功疏

擬惜人命以養天和停傳造以恤民艱疏

查參解官疏

查參內臣疏

乞究處賊犯疏

諫停抄沒疏

請罷營臣疏

參究鑽刺武官疏

催發參究疏

議拯運道疏

恭報糧船過洪疏

查參運官疏

蘭臺奏疏

目錄



101505



消弭災變疏

卷二

糾參盜臣疏

摘陳漕政疏

議補科道疏

議併河漕設巡撫疏

議處科場疏

參處府佐疏

乞復用人舊制疏

議通鹽法疏

議撫臣駐劄疏

議舉營田疏

催補司官疏

懇請停遣中官以維鹽法疏

再陳中官不宜干撓鹽政疏





卷三

乞裁察無沒官鹽疏

祈究處貪官疏

乞查究偽印巨奸疏

再陳無沒官鹽疏

乞敕察棍徒弄法疏

懇乞回籍疏

再陳會查鹽政疏

撫安窮竈疏









# 蘭臺奏疏卷一

擬崇實學、務實政、核實功疏。

明 靈壽馬從聘著

今天下事最大者。則莫如士習、吏治、邊務矣。士習弗正。則無以維持名教。而天下之人心日漓。吏治弗興。則無以綏安黎庶。而天下之元氣日索。邊務弗飭。則無以振揚威武。而天下之神氣日靡。此三者所關匪細也。其在今日。則有大壞極敝。如江河之日趨。而莫知底止者。識其敝而亟返之。是有道焉。一曰崇實學。以端其趨。二曰務實政。以考其成。三曰核實功。以勵其氣。何言乎實學之當崇也。國家設學校。以造士。求以適用也。今操觚翰者。竊記誦以獵聲華。而叩之則無有。剽蕪蔓以媒青紫。而用之則無當。間有好奇喜異者。又索之不可知之域。舍經傳而內典之爲披。薄彝倫而釋子之爲友。忽其仁義道德之常。而治其虛無浮游之說。鼓波蕩之士。習而趨之。風至陋矣。臣愚謂宜申敕教條。明示嚮往。士有通今博古者。錄之。而黜其剽竊者。孝弟力行者。舉之。而斥其浮誕者。又嚴責督學之臣。率先振作。卽以士風之醇漓。定督學之殿最。庶趨向明。而士習其可正乎。何言乎實政之當務也。國家懸爵祿。以授官。凡以爲民也。今司民社者。以簿書爲常職。而民瘼罔聞。以催科爲善政。而拊循則缺。又其甚者。工爲剝削。曲事逢迎。苟可以悅上官之意。雖竭民髓而不恤。苟可以濟溝壑之欲。卽腴民膏而不計。蓋類若穿窬而行。同市井矣。若之何令民



命之不日殘而民生之不日困也。臣愚謂欲安民生，惟在責有司勤撫字。欲有司勤撫字，惟在責撫按公體察。吏有廉勤公謹者舉，而貪墨者劾；惻怛無華者旌，而文巧者罰；其暱情徇私以愛憎爲毀譽者，坐罪不貸。庶法令嚴而吏治其可興乎？何言乎實功之當核也？國家設立將士以衛邊，將以禦侮也。今司邊疆者以和好爲權宜，以賄虜爲長策，馬價暗償而脂膏已竭，金幣日增而求索無已。一或糾衆入犯，我師輒以敗聞，甚至上功之際有殺被掠之人以冒賞者，而罰弗及；戰鬪之際有奮挺前進以捐生者，而賞弗及。將士安得不解體也？臣愚謂宜申敕憲臣覈實賞罰，其虜入之時某所守將某出兵與戰，斬獲虜首若干，具以聞而賞加焉；某處守將某關壁不救，被虜生口若干，具以聞而罰加焉。庶勸懲當而邊務其可飭乎？雖然，督學董一方之學政也，撫按綜一方之吏治也，邊疆憲臣核一方之軍功也。其責成固不可不重，而端本澄源則總歸之皇上之一身。經筵日御，召對時勤，此爲皇上典學之實也；辨色視朝，日中聽政，此爲皇上勤政之實也；賞不遺遠，罰弗遺近，此爲皇上核功之實也；皇上誠審是三者而力行於上，公卿百司協贊于下，則精神感召，誰敢不敬應者？將見風俗懿美，治化醇濃，升斯世於大猷，鞏邊陲於甯謐，萬世無疆之休將在斯矣。惟皇上留神省覽，則世道幸甚，宗社幸甚。

擬惜人命以養天和、停傳造以恤民艱疏

竊以人君一身操威命靈爽之權，享萬邦玉帛之奉，亦何爲而不得？乃好生之德，載之虞書，卑服之訓，垂之夏典。古之聖帝明王，何有天下不以恣睢而故抑其心，以下徇閭閻之赤子哉？誠知民生莫不欲壽，故



生之而不傷。民生莫不欲富。故節之而不困。所以體天地愛養之心。而造四海元元之命也。彼其時天地降禎。黔黎戴德。太和洽於宇宙。聲稱浹乎來茲。厥有由矣。我皇上重辟三覆。罔圉歲清。比聞細民稱冤。覓死禁地。遂惻然動念。特諭秉憲之臣。虛心鞠審。非不知人命之當惜矣。奈何貂璫婦寺。敲扑時聞。冤號之聲。徹於大內。似於愛惜人命之心。未免有違者。豈以此輩微賤。死生無關於天命乎。臣聞庶女籲天。霜飛燕地。孤兒被枉。風襲靈臺。一物感之。靡有不應。況乎冤斃者。若是之衆也。竊恐乖厲之氣。上通於天。邇來災沴頻仍。雨暘失序。是未必無以召之。言及於此。何可不爲動念也。我皇上憫災下蠲。租之詔。救荒頒內帑之金。比念民生凋敝。由吏治皆窳。懲貪戒汚。屢廛明旨。非不知民艱之當恤矣。奈何傳造之令。日益月增。陝西之褐。四川之扇。不一而足。似於軫恤民艱之心。未免有違者。豈以下民易虐。貧富無關於國運乎。臣聞君民一體。剝民以奉君。猶割股以充腹。股盡而身亡。民窮而國危矣。邇歲河南閩中。一遭饑饉。赤子弄兵潢池。甘投法網。而不顧。念及於此。何可不爲寒心也。伏願皇上念人命之匪輕。思民財之有限。體虞舜好生之德。勿或無辜妄殺。以干天地之和。遵夏禹卑服之規。勿或額外傳造。以重黎元之困。將見和氣感召。休徵協應。恩澤覃被。兆庶乂安。而天下萬世。誦皇上之仁儉。直與舜禹比隆矣。臣無任激切懇祈之至。

### 查參解官疏

題爲解官換錠盜銀、審驗已確、謹據實查參、祈賜究處、以懲奸弊、以重國儲事。臣奉命巡視銀庫。監臨出



納稽查奸弊。是其職掌。今六月二十日。據該庫揭開。山東解官周成文。解到漕折銀三萬一千二百兩。赴太倉銀庫上納。次日清晨。該臣至庫。同監庫主事馬維駟。陪庫員外郎傅之基。開驗第一鞘。內銀一千兩。十九大錠。一小錠。心竊疑之。謂每鞘二十錠。每錠五十兩。以合一千兩之數。此從來解納舊規。亦備在鞘冊。可查也。何有銀錠大小之不同。隨取小錠。用天平秤較。止銀四十三兩。復取印封樣銀。及十九大錠。逐一秤較。每錠五十兩外。大約多重三錢五六分不等。夫一錠重銀三錢五分。總計一鞘二十錠。共重銀七兩。今小錠內卻少銀七兩。似爲解官知其多。而換錠竊取之也。臣等復取銀錠原造字迹。逐一辨驗。每大錠上。各造某州縣漕折銀一錠。五十兩整。及銀匠姓名。小錠止造某州縣。及銀匠姓名。並無造明銀數。夫大錠止造正銀五十兩。既未開有餘零。小錠因何少銀七兩。又不明開銀數。其爲解官知其多。而換錠竊取之。益無疑也。臣等復將三十一鞘。通行驗看。每鞘內攙一小錠。每小錠少銀七兩。中間復有翦邊二十餘錠。及至秤兌。有一千兩僅僅足數者。亦有少一二兩。少三四兩者。蓋僅僅足數者。止係抽錠改傾。間有短少。乃既改傾。而又翦邊者也。除正數短少。當令補足外。竊思銀兩既已足數。似可無事。苛求矧一卑卑縣佐。亦何足以煩論列。而瀆宸聰。第事干錢糧。奸弊百出。雖重懲之。猶不止也。前歲河南解官李廷槐。劉案翦邊事犯。曾被參提。問罪褫職。臣謂法令方新。庶幾人心知儆。曾未幾時。而解官周成文。復踵前弊。換錠翦邊。恬不知畏。若不參處。誠恐侵盜信爲得計。倣效遂至成風。將來弊竇叢生。莫可究詰。是小民之脂膏。用以實朝廷之積貯者。祇以潤奸人之囊橐矣。且銀錠缺數缺邊。匪但情弊易見。亦且支放爲難。見今



太倉庫貯。河南所解翦邊銀九千餘兩。當事者畏避嫌疑。不敢給發。蓋慮不知者。私議太倉銀錠。從何翦邊。監收之人。其誰辭責。雖事經題明。亦安得人人而喻之。臣爲此懼。則據實查參。蓋亦有所不容已也。伏祈敕下法司。將解官周成文行提勘問。果有侵盜情弊。依律究懲。庶法紀可昭。奸弊可杜。而國計民生。未必無補矣。

查參內臣疏

題爲地方人命事。本年十二月二十日。據思城坊五牌四鋪總甲劉其報稱。本月十九日巳時分。有地方官牛房軍人韓鐸。叫知本役。說稱有甯二在於官牛房內身死。當捉王內相家人王昇、韓鐸、羅恩、李彩見在等情到臣。看係人命。隨批行兵馬司相驗去後。今據該司掌印指揮潘維高呈稱。遵依帶領吏仵人等親詣已死甯二卽甯大銀屍所。眼同屍親相得本屍生年二十六歲。屍傷在冊。相畢。令總甲浮埋外。當場審據犯人李彩執稱。係武驤右衛軍。向在尙膳監內相王應科名下答應。有先存今被應科杖責身死。甯大銀於本年十一月內。買頂本監未到官廚役王甯差役充當。比王甯向欠王應科官伴月錢。并大銀十一月十二月官伴月錢。共五錢。通未交納。至十二月十七日。王應科當差彩與未到官何祥。將大銀拘赴私宅。逼討前銀。比大銀說稱。月錢俱是王甯拖欠。不肯輸服。王應科喝令彩等責打。大銀不服。以致應科氣忿。先行踢打。復令彩將大銀採倒。何祥執棍責打十五下。仍將大銀押送外牛房內相趙經處。墩鎖門房內。在官軍人韓鐸看守。至十八日。趙經又令在官軍人羅恩責打十板。仍復墩鎖。至次日巳時分。大銀



被打傷重。氣絕身死等因。呈解到臣。除面審相同外。爲照內相佔用廚役。私討月錢。非正法也。况甯大銀認役未及兩月。欠銀不過五錢。輒被王應科逞忿腳踢於先。棍責於後。押付趙經。用刑苦拷。且復擅行墩鎖。竟致越宿殞生。人命重情。法當鞠究。但王應科趙經俱係內臣。例應奏請。伏乞敕下該衙門。提問正罪。庶死者不致含冤。而法紀方無枉縱矣。

乞究處賊犯疏

題爲監犯久羈。正罪無期。仰祈明旨處分。以便遵行。以彰法紀事。臣近奉都察院劄委。帶管巡視中兵馬司事務。檢查舊案內一件。該前任御史李宗延題爲貪饕勳臣。定價鬻官。縱容猾役。設局朘軍。乞賜斧斷等事。蓋因見監中兵馬司犯人吳坤、白如璧、顏如珍、盧光祚。與人命重犯葛應奎。俱係總督京營、臨淮侯李言恭下椽房書辦。先以喧犯到城。互相稟訐。據葛應奎稱。伊等椽房作弊。剝削營伍款項多端。每年騙銀約共二千餘兩。歷有指據。時御史李宗延痛奸書之玩法。咎主帥之非人。隨具疏參論。而李言恭亦具疏奏辯。俱奉聖旨。該部知道。欽此。隨該兵部題覆。於李言恭議行照舊供職。於吳坤等議行法司提問。疏凡再上。未奉明旨。繼值軍政考選。言恭循例自陳。奉聖旨。卿典營務。著照舊總督。卽出任事。不允辭。兵部知道。欽此。爲照李言恭先經論列。部覆雖未處分。後因自陳。奉旨業准留用。臣亦無容再議矣。至如吳坤等。俱以市井神奸。營充書辦。倚督府爲城社。大恣狐鼠之謀。吮營軍之脂膏。難滿谿壑之欲。弊竇奚啻百出。賊私多踰二千。此皆同類之口供。非若風聞之無據也。緣係被參人犯。未經奉旨。羈獄日久。結正無期。



懇乞敕下法司。將吳坤等查照原參事情。提問如律。庶諸猾之奸弊。知懲。營伍之夙蠹。可除。而以清戎政。以肅法紀。胥繫之矣。

### 諫停抄沒疏

題爲抄事未完。因災攄悃。懇乞聖明。速賜寬處。以裨聖德。以安人心。以回天變事。頃者乾清坤甯二宮。一夕並災。該內閣傳奉聖諭。禮部遵諭。擬款備擇。業已奉旨遣祭。飭官及合行事宜。諭還候旨行矣。天語昭昭。煥如日星。又經閣部諸臣條陳具在。臣何敢瑣瀆。以煩天聽。惟是臣等奉旨監抄以來。倏經兩月有餘。所沒各家粗重器物。充物宮庭。致火之由。未必不由於此。且各犯雖經處分。而前件猶未結絕。臣敢無一言。以爲修省之助。夫皇上始而抄及張禎、張勳、霍文炳等。以其賄冒職銜。連姻外戚。臣等方兢兢奉旨之不暇。夫何容言。繼而抄及張禎、王鈺等一十八家。以其引誘撥置。生事害人。雖較之誠等。情固有間。而罪以撥置。不爲無名。臣等亦兢兢奉旨之不暇。夫何敢言。惟是鎮撫司一行打問。則招扳愈衆。株連無已。由宮闈以及輦轂。由輦轂以及畿輔。挾詐公行。閔然騷動。怨聲騰沸。咨嗟載道。於斯時也。臣不宜明白據實。爲皇上指陳其狀乎。徒以孽由閹作。未必無自取之因。則不宜言。身在事中。或不無庇護之嫌。則不敢言。且恐愈言愈激。爲禍愈烈。故默默隱忍。終日相對。徒爲長嘆。致使民怨已深。天怒隨之。釀有今日之禍。臣雖萬口。何所逃於不言之咎乎。顧今上天雖已見災。而予奪無常之命。正視聖心。以爲轉移。聖心雖切兢惕。而出入無常之心。恐因災過。而或衰止。臣願皇上深惟致火之由。近思消災之故。欲回天心。則請自回



人心始欲回人心。則請自回聖心。始欲回聖心。則請不吝改過。渙發德音。大宏祝網之仁。曷寬各犯之罪。如正犯之財產已抄入者。無議矣。其父兄弟姪。原以無罪波及者。量還其房屋田土可也。王鈺等之畏刑供報。其在刑部已追完入官者。無議矣。其見在追比者。卽爲停免可也。張恩等三人。一語被扳。并沒其產。亦已甚矣。卽徑釋其罪可也。由是自內以推之外。凡挾仇訐首者。悉宜停免。望風扳報者。俱與開除。安內外反側之心。息遠近驚惶之慮。更惟博採諸臣之議。勤修當務之實。則聖心旣回。人心亦回。人心旣回。天心亦回。將不旋踵而踴躍歡呼。足以召人和而消天變。社稷無疆之休。在是矣。不然。徒崇遣告虛禮。而不求致災之本原。徒事修省之靡文。而不務消弭之實政。臣恐天鑒日臨。尙有不測者在也。臣等奉旨監抄。而今日之變。談者大都咎此。故專以抄事未完者言。而他不敢漫及也。臣等無任激切待命之至。

請罷營臣疏

題爲冊使辱國被逮。營臣兵柄當釋。懇乞聖明。亟賜罷免。別選才望勳臣。代總戎務。以彰乾斷。以釋羣疑。事。夫封倭之非策也。舉朝之臣。皆知之。惟是輔臣決意主持。樞臣極力擔當。事已垂成。勢難中止。李宗城以通侯之胄。膺簡命之隆。前思主恩之重。後畏國法之嚴。陛辭之日。卽致身報主之日。使倭果委心效順。則守一封無過之約。固足以明我信義之重。卽倭或狡詐渝盟。則勵百死不變之操。亦足以銷彼窺伺之謀。庶幾此一役也。雖未爲乂安之計。亦可結目前之局。豈不毅然稱不辱之良使哉。奈何念重貪生。心非許國。一聞流言之傳布。輒先棄節以潛逃。辱體傷威。莫此爲甚。皇上赫然震怒。扭解來京。三尺俱存。臣何



容贅。獨念李宗城者。今總督京營。臨淮侯李言恭之子也。子既以辱命被逮。其父尙可使之握重兵。居要地。恬然不以爲意哉。且言恭貪饕不檢。御史李宗延曾劾之。病殘曠職。科臣徐成楚曾劾之。該部題覆。委曲議留。俱以宗城出使之故也。其曰伊子李宗城。承命冊使日本。父子忠勤。尤當體其私。而寬其議。今副使楊方亨。及隨從員役四百餘名。尙在倭營。安然無恙。而宗城委棄印冊。乘夜潛逃。所謂父子忠勤者。安在耶。其曰朝廷方簡其子。以重皇華之選。似當優其父。以寬內顧之憂。夫以言恭屢經彈射。皇上任之。不疑。所以優之。寬之者至矣。宗城之急。急於私逃也。豈內顧之憂。尙有未釋耶。抑亦未講於皇華之義耶。夫言恭之宜斥而久留也。既以子出使之故。今其子已逃矣。業奉旨逮繫矣。縱使言恭負干城之望。抱克壯之猷。亦宜無顏就列。而况貪饕不檢。病殘曠職。真有如二臣之所劾也。則京營重任。寧可一日苟容乎哉。懇祈明旨。將李言恭亟行罷斥。仍敕下該部。會推才望勳臣。補充斯任。庶國典以昭。輿情共快。而於戎政軍機。亦重有裨矣。

參究鑽刺武官疏

題爲武官潛京鑽刺。棍徒違禁。走空事。據中兵馬司副指揮王道達。捉獲走空犯人一起。錢大源供。年四十二歲。係宣府右衛冠帶總旗。於萬曆二十一年四月內。蒙兵部推陞北路雲州守備。八月內。更調鎮安堡。至二十三年二月內。貪玩事犯。蒙宣大巡按御史戒飭。大源自知官聲敗壞。告病回衛。今年二月內。要得起用來京。在於先年嫖宿娼婦。辛一兒家姦住。至三月初十日。大源行至西長安街五聖廟門首。撞遇



在逃棍徒張思田。窺知大源來歷。易得誑騙。即便向前誘說。我好似認識你。曾做守備。可惜這等一箇身材。如何閒廢。若要幹起。用我與你尋條門路。此處有我契友胡藻。係宣大軍門巡書。他素諳各衙門事體。可全你拜訪。共相扶持。大源聽信。即同張思田。至胡藻寓處拜望講話。各散訖。至五月初四日。張思田。胡藻。尋至娼婦家。向大源稱說。我們尋得相知脫逃洪俊宇。他說不在官。伊姐夫王舉人。與兵部申郎中相厚。若事得成。要謝禮銀四百兩。當面封記。方纔成得等語。大源應允。止先備銀二百八十八兩。寄在賣綢相識宋汝奇鋪內。至二十六日。比張思田。洪俊宇約定。先至宋鋪等候。大源隨後邀同胡藻。一齊到鋪。眼同將前銀拏出驗過。仍付宋汝奇鋪內質放。其餘欠銀兩。候事成找完。講畢。各散訖。大源屢向張思田。洪俊宇問信。伊哄說。你告病未久。事當緩圖。可在此再守候幾月。方可成事。大源聽信。守候間。不期緝事兵番武得功。陳科。訪知大源等形迹可疑。襲至娼婦辛一兒家。將大源等拏獲到官。當蒙審出前情。併追出原寄銀二百八十八兩。除逃犯張思田。洪俊宇。俟緝獲解報。合將見在賊犯。備由呈解到臣。該臣覆審相同。參看得邇來廢閑武弁。潛住京師。倚託棍徒。夤緣鑽刺。屢經該部題請。明旨申飭。禁例森嚴。昭如日星。不謂錢大源。張思田等。明知而明犯之。恬然無畏也。錢大源先任鎮安堡守備。賊迹敗露。已經按院戒飭。勒令告病回衛矣。亡何。攜賄入京。欲以剝軍之財。復爲起官之具。張思田等。窺知大源營求之私。可以行其誑騙之計也。遂呼朋引類。共相牢籠。借口部司熟識。請託可通。先以二百八十八金。質當於宋汝奇之家。蓋暫設爲假手之謀。實視爲充囊之物矣。儻幸而中。則該部併被其點污。卽不幸而不中。則大源已遭



其白騙。此真市井之神奸。京師之巨蠹。均當重究。以示懲創者也。除見在銀兩發司收貯。脫逃張思田、洪俊宇。行令嚴限緝拏外。伏祈敕下法司。將錢大源等提問如律。仍枷號示儆。該司員役緝捕有功。并行紀錄獎賞。庶勸懲昭明。人心儆惕。而禁地奸徒。亦稍知斂戢矣。

### 催發參究疏

題爲捉獲奸徒、祈降明旨究處、以昭勸懲、以明法守事。先該中兵馬司副指揮王道達。申解犯人錢大源等一起。據錢大源供。係廢閑守備。攜賄來京。營謀起用。轉託棍徒胡藻、張思田、洪俊宇。許以四百金。代尋門路。先將二百八十八金。質放於綢客宋汝奇鋪內。定議事成付完。偶遇緝事兵番。連贓捉獲。送司申解到臣。審實無異。隨於七月十八日具題。延今月餘。候旨未下。竊惟禁戢奸宄。肅清畿甸。自是兵馬本務。况鑽刺走空之禁。屢經該部題奉欽依。刊布告示。又昭昭在人耳目者。今錢大源用財干進。正合鑽刺之條。胡藻等指稱誑騙。明犯走空之例。該司兵馬王道達。人贓俱獲。審實解報。可謂能其官矣。若不仰藉明旨。重加處分。誠恐禁令祇爲虛文。人心何由警惕。將來狐鼠公行於輦轂。魍魎晝見於通衢。又誰得而禁之。伏乞敕下法司。將錢大源等。查照原疏。盡法究擬。該司員役。緝捕有功。照例紀錄。庶法嚴而奸徒知戢。賞信而人心競勸。臣職司巡視。亦得藉以追責矣。

### 議拯運道疏

題爲洪限已逼、河水日消、乞敕總河大臣、從長決策、多方拯救、以濟然眉、以裨漕務事。我國家歲漕東南



四百萬石。灌輸京師。督粟責之漕臣。治河責之河臣。誠以百萬軍民之所係命。蓋重之也。臣萬歷二十四年冬。受命催餉。適值浙直告災。黃河稱竭。顧瞻時事。竊抱殷憂。日按職掌。以相期責。不遺餘力。惟時總河尙書楊一魁。目覩黃流斷阻。日馳河干。百端籌畫。議開小浮橋。築義安山。濬小河口。引武沂泉。諸工並興。亦自信無遺策矣。夫一魁河臣也。治河乃其專責。時方畢力經營。卽臣何敢遽生異見。以掣當事之肘。滋築舍之議哉。旣接一魁報工疏。揭謂小浮橋開壩放水。勢如建瓴。徐州迤南。陡增二尺。黃河庶幾復覩昔年景象。臣一見之。竊沾沾喜也。而尙不敢信以爲然。每行據運官千戶江通王維翰等逐段開報。咸稱河淺膠舟。起剝方進。臣屢嚴督管河各官。多方築濬。勿致阻誤。各官回報。皆謂官民船隻通行無阻。無論報臣爲然。卽總河前後二疏。不謂河水通流。新運可濟。確然以實見得。是自任哉。臣三月十八日。催餉糧船五千六百餘隻。尾押過淮。忽接總河手書云。因河水流而不盈。親至義安山。看得水口合而旋決。塞之不易。又勘得迤北有濁河故道可疏。足濟鎮口以下三十里之淺等因。又據千戶王維翰呈稱。本幫船十四日行至黃鐘集。不期河水陡耗尺餘。致船淺閣。每船起米三百六七十石。方能撻拽過淺等因。又准中河郎中黃承元手書云。義安山決口築塞將成。而小浮橋新渠窄狹。洩水有限。黃流停漲數日。退縮而西。來流遂緩。旋又決原壩二十餘丈。以故日來小浮橋之水漸微。雙溝以上。灘淺復生。重運艱澀。爲今日然。眉之計。當將原議草闡。速爲建設。置黃流於度外。惟以見在之水。撙節用之。庶可通運等因。臣蓋不勝驚異。謂前此河臣。皆謂河道通流。可保必濟。今五千糧船。聯檣畢集。考之洪限。業已屆期。何一旦決裂至此也。



臣覩議單一款糧船依期前進河渠淤淺疏築無法致有停阻不得過洪抵灣罪在總理河道悉聽科道官參究又一款河道大小官員臨期誤事者照依運官參降事例阻淺十日該官有司軍衛罰俸半年阻淺二十日罰俸一年阻淺一月軍官降一級回衛差操有司降一級赴部調用管河郎中照才力不及事例降一級調外任河道都御史聽南北科道巡鹽巡倉御史參奏定奪今河道停阻從來無若此之甚執此以罪河臣其何說之辭第今春天道亢旱風霾異常河水陡消適當時變且目前料理需人似宜責以後效但恐時勢已迫工難速成數千糧艘豈能久待雖總河尙書見今往來河上督率官夫開濁河故道建束水草閘欲僥倖萬一之能濟不知濁河故道與小浮橋等耳小浮橋旣已無濟濁河雖開安必有濟哉至閉閘蓄水惟閘河爲可用蓋閘河兩岸皆隄水無所洩若黃河舊身可闊數百餘丈卽行閉閘水將傍溢竟亦徒費無益也臣聞黃堦決口迤上有北岸掃灣一處直對正河僅止三里從此開濬卽不能全輓正河亦可仰受黃流之一二又舊河口有一淤觜阻礙河流應量加展窄數十丈順接水勢亦可延黃流一線之脈二策皆足濟運前者各官僉謂可行一魁恐引賊入室持議不果似猶泥於成說者噫此何時也勢已焦喉患且剝膚苟有裨於通漕何必出自己見伏祈嚴敕總河大臣虛心酌議以上二策果如可行卽多調夫役併力疏挖以期克濟儻因循不決坐失事機致洪限有違國計有誤河道大小臣工皆難辭責容臣查照單例據實參奏仰聽皇上分別議懲庶人心知警而漕事或可補救於萬一耳

恭報糧船過洪疏



題爲恭報糧船盡數過洪、以慰聖衷事。節據專管漕務按察使白希繡、徐州兵備按察使徐成位呈報。各總衛所運萬歷二十五年分該過洪糧一百九十二萬九千九百七十八石七斗二升七合。船五千七百二十五隻。俱於本年五月二十五日盡數過洪。訖緣由到臣。臣惟黃河之爲漕患也。在往歲獨畏其驚濤。在今歲更憂其淺澀。蓋自黃堦決口。全河南注。鎮徐一帶。僅賸涓流。臣自受命南行。目覩中河景象。已知其必爲漕梗矣。故當首幫過江之時。卽填給印封。令隨所過河水淺深。逐段馳報。時值浮橋新開。河冰始泮。間雖稱有灘淺。尙可剝輓通行。不謂三月以來。天道恆暘。河水消縮。邳宿三百里之運道。尙可停舟。徐鎮數十里之漕渠。遂同平陸。臣一得報。神怖心驚。謂數千糧艘業已齊集。不知將安稅駕也。時恐洪限有誤。已先具疏上聞。隨經總理河臣督領官夫分投疏築。上源掃灣開。而鎮口之水漸至。義安決口塞。而浮橋之水復來。二流既合。漕艘始利。臣復行專管漕務。按察使白希繡、徐州兵備按察使徐成位分駐徐宿上下。躬率管河押運同知通判把總等官。或對岸捲掃。以資衝刷。或攔河置壩。以遏下流。仍嚴令旗軍盡卸土物。分行有司。多備剝船。晝夜程督。挨壩遞進。又該常鎮糧儲兵備右參政彭國光。尾幫催押。揚州遊擊袁世忠、徐州參將韋國禎。南北護防。兼以統率之兵。資其拽輓之力。以故五月未終。而重運糧艘。完壁抵徐。洪之北矣。此皆賴我皇上仁惠潛孚。軍士忘勞於鼓舞。威靈遠懾。臣工奉命以肅將。運道雖值偶艱。限期幸無大逾。誠非臣始望所能及。從此入灣抵壩。可保萬全。則輸之閭閻者。已爲大庾之積。輓自士卒者。盡屬軍國之需。皇上旰食裕國之懷。庶幾其少慰乎。一時共事諸臣。勞苦實倍。至於總理河臣。自徂冬



以至今夏。馳驅於徐邳桃宿之竟。衝冒於風霜雪露之中。啓處不遑。以籌河務。臣所目覩也。豈其不知。而好爲露章。以相譏切哉。蓋以總河職在通漕。儲糈上關國計。運道淺阻。惟河臣之責。臣不敢以顧其私糧艘過洪。亦惟河臣之功。臣何敢以蔽其美。總之事在爲公。誼存共濟。臣無容心也。除分督司道等官。例得事竣薦舉外。若總督漕運。戶部尙書褚鈇。懇款許國之忠。慷慨匡時之略。擁節旄於淮上。則惠澤與威令兼施。而如山如河。東南誦保釐之績。持籌算於幄中。則調劑與會期不爽。而爲雲爲雨。中外倚康濟之猷。望孚秉衡。勞堪施鼎。總理河道。工部尙書楊一魁。清肅而簡要。忠亮而篤誠。慮先宗社之本根。則力輓狂瀾。而注海業見三陵鼎峙。念切軍民之命脈。則廣疏支派。以通漕。竟看萬舸雲流。匪直利涉舟楫之通材。允屬陶冶乾坤之妙手。提督漕運。總兵官。新建伯王承勳。風神閑雅。天韻沈雄。號令行於賞罰。嚴明之間。董十萬翰飛之旅。而若雷競奮。籌策定於樽俎。雍容之際。操數千鱗集之舟。而如電爭馳。忠猷克紹家聲。妙略允資邦計。管理南河。工部郎中李元齡。履淮泗之舊遊。故智略無煩再試。而導積防衝。直擬平成之蹟。管理中河。工部郎中黃承元。歷汶衛之熟路。故規畫甫竭一斑。而尋源置壩。獨高利濟之功。淮安管廠。帶管淮倉。工部主事羅尙賓。以飭材而兼司餽餉。百工中度。萬竈銜恩。爰識經綸之妙用。淮安鈔關。帶管理刑。南京戶部主事王忠顯。以權關而攝領刑章。百艦星飛。三尺霜凜。具占操縱之微權。徐州管倉。戶部員外郎葉偉。峙糧糗以待輓輸之衆。而頒粟及時。歡聲徧播於河滸。揚州鈔關。南京戶部員外郎武揚。蠲刀錐以酬櫛沐之勞。而啓關如限。芳猷驟動於維揚。過此則入鎮口矣。又如夏鎮管閘。工部主事楊爲棟。



南旺先後管閘、工部主事陸化淳、胡瓚、張秋管河、工部郎中康夢相，皆隨地以畫先猷。泉源之蓄濬以時，相機而圖永利。漕渠之盈溢不竭，前幫已聞起納，後至何有留行。以上諸臣，皆殫勞運務，著績漕河。臣所迪知灼見，而不敢不以上聞者也。

查參運官疏

題爲查參貪饕運官，以清漕政事。據浙江帶管糧儲、右參政唐守欽呈稱：行據杭州府招問得一名陳文義，年四十一歲，係海甯所軍。狀招萬歷二十三年，蒙委本所在官千戶楊師旦督運，僉選義與已到官李萬等四十一名，各管漕船一隻，領兌本年分漕糧。師旦因見各船領有行糧等銀，指以沿途過淮到京費用及參官紙劄四十一船，除座船書房船四隻，原無使費，餘船三十七隻，將行糧每船扣銀二兩四錢，計銀八十八兩八錢。又以船至水次兌糧，每船科供給銀五錢，共銀一十八兩五錢。又分外科每船加紙劄銀三錢三分，共銀一十二兩二錢一分。又以呂城鎮江送禮，每船科銀三錢五分，共銀一十二兩九錢五分。又過淮使用，每船科銀四錢，共銀一十四兩八錢。又以上京投文用費，科銀每船一兩，共銀三十七兩。指參官每船又科銀一兩，共銀三十七兩。各船交兌完畢，每船例給羨餘銀四兩，止給一兩，每船剋銀三兩。內李萬張臺徐行仇鳴四船，分文不給，共剋銀一百二十七兩。又扣席銀，每船一錢二分，共銀四兩九錢二分。比義因見本官貪剋，沿途將米與駕船人役食費，并自己行糧匿侵，慮恐交納不敷，暗將黑米插和在於桅後一艙。二十四年五月，船至桃花口地方，師旦聞知，插和查究，問義懼責，治弃船逃回。隨該本



官具呈前巡漕况御史。批行浙西總緝拏究報。比有義兄將糧交完。義思被師旦剋斂前銀。復又盤糧。要得泄忿。及有義舅李萬。同各甲將師旦科斂情弊。告蒙浙江撫按衙門。批發道府究問。閩浙西把總臧國光。查得陳文義。見在聽問。具呈請批該道。該道遵行杭州府季知府審得師旦科索。歷歷有據。而沿途過淮到京使費。實爲不貲。其因公者量追一半。非因公者全追。各給軍量。擬罰穀。文義知虧脫逃。實起釁端。擬杖示懲。轉招呈詳到臣。臣惟漕政之蠹。惟科斂爲最甚。運官既有科斂。則旗軍得以持其短。故夾帶遷延。插和盜賣之弊。一切置不能問。往往侵費官糧。起納掛欠。率皆由此。踵習成風。牢不可破。前後漕臣。百計飭之。而不能止也。若師旦領船四十一隻。科銀三百餘兩。已則不法。奚以禁軍士之姦欺。費卽因公。何至如賊私之狼藉。量罰未伏其罪。盡法庶儆其貪。旣經該道審問明白。合應參究。參照海甯所領運千戶楊師旦。叨承世職。罔恤漕規。藉領運之權。用吸軍髓。假非公之費。以實私囊。旣違犯賊之條。允合立功之例。伏乞敕下戶部。咨行漕司。將楊師旦同運軍陳文義。行提到官。查照律例。盡法究懲。庶貪風少儆。積弊可釐。而漕政其一清矣。

### 消弭災變疏

題爲災變疊出。危機可虞。懇祈皇上。亟順人心。以回天怒事。臣奉命催償糧運。六月十九日。尾押過德州。見山東司道等官。對臣言。近日泰山崩開一處。相離一里有餘。共相驚詫。以爲非常之異。及二十三日。行至天津。見邸報。始知殿庭被災。視昨歲兩宮之災。更加酷烈。益不勝悲歎。謂邇來時事乖舛。四方災報頻



仍然未有昭明顯赫如此之甚。且并見於一時者也。隨該閣部臺省諸臣指陳朝政之闕失。條上修省之便宜。纖悉俱備。業蒙俞旨。次第施行。轉禍爲福。易危爲安。此其機矣。而開礦一事。尙未允停。及見錦衣衛指揮楊宗吾。參究原奏官許廷諫。恐嚇官民財物。假雕印信關防等事。雖奉旨允行撫按提問。而開採如舊。皇上將謂懲此一人。遂可盡絕騷擾之害。全享開採之利乎。礦之蠹費殃民。招釁啓亂。前後諸臣言之已盡。臣無容贅。獨計泰山者。五嶽之宗。百靈之會也。一旦崩移。豈無自致。蓋地脈宜於厚藏。靈氣忌於宣洩。年來開礦之使。分道四出。無論有礦無礦。一概開挖。斬絕地理之綱維。毀傷山川之靈氣。泰山之崩。兆實應此。及今停止。尙悔其遲。若再因循。更復何待。昨輔臣所奏。專責撫按管領收採。取盈今數。尙爲委曲遷就之術。未盡拔本塞源之論。奈何皇上尙以爲難也。況原奏各官。盡無籍乞丐之徒。資身無策。借名獻礦。因而窟穴其中。藉威生事。騙詐擾民。無所不至。而仲春實爲之倡。曾經河南撫按連章參奏。原疏見在。可覆而核也。至於真保等處。奏官鄭一麟等。初至地方。尙騎馬張蓋。旣而乘轎辟人。卽投靠棍徒。亦抗禮縣官。嚇取財物。况閭閻細民。其何以堪。紀綱凌壞已極。人心痛怨入骨。種種惡孽。俱不在許廷諫之下。懇乞皇上。當此天怒已甚。時勢已極。屏絕殖貨之私。亟下更始之令。將前後遣使。悉行召還。仍行各地方撫按。查原奏官所犯罪狀。據實上聞。分別議處。用彰皇上改過不吝之誠。以洩萬姓積憤不平之氣。雖天之降罰。厥咎尙多。而泰山之崩。兆實在此。故亟停開採。實今日消弭之一大端也。臣無任激切俟命之至。



# 蘭臺奏疏卷二

## 糾參盜臣疏

題爲盜臣遺臭、士類蒙羞、懇乞皇上、亟賜屏斥、無使重玷清班事。臣接邸報、見巡城御史况上進、參劾司經局洗馬鄒德溥、盜分匿贓等事、奉聖旨、鄒德溥著吏部參看了來說、欽此。竊思德溥贓證已明、情詞畢露、皇上不卽處分、付之吏部、得非謂德溥衣冠之流、盜銀穿窬之行、事出駭聞、法難盡執、欲得其疑似之端、以遂其引避之計乎。此皇上覆載之宏量、茹納之寬仁。臣工當將順之不遑、何敢復贅。第德溥事犯至此、有百口不能辭、萬罪不足惜者、試爲皇上陳之。臣尙記霍文炳小房一區、原係賃人居住、當工部估價之後、德溥卽向中城求賃、臣查兵馬司冊報、本房見有人賃住矣。遂據以辭之、而德溥不已也。無何、又託言承買、臣以事屬工部辭之、而德溥猶不已也。一則謂同門人王良材就中講習、一則謂附近東華門、便於入直、四覆三番、千態萬狀、必欲求遂而後已。惟時臣止厭其瑣屑猥鄙、置之不應、而初不虞其假住房之名、懷盜竊之計也。旣而德溥勢驅計誘、竟將居者強之使去、而所稱講學入直者、竟屬空言、其實未嘗一朝居也。以今日之事犯、回想前日之情詞、謀盜之形、宛然在目、不意德溥冒道學之名、忝清華之貫、乃人面獸心、狗偷鼠竊、寡廉鮮恥、辱人賤行、一至此極也。然亦幸而早敗耳。儻夏龍不首、盜迹不彰、以彼生平之虛譽、處今日之清階、行且漸躋要津、立登揆路、恐其以盜跖之心、與聞國家之議、壞法亂紀、干名犯



義無所不至。其爲世道人心之患。有未可一二數者。此等事情。言之則汙口吻。書之則汙簡牘。在國中則爲冠裳之玷。在鄉井則爲梓里之羞。卽豺虎不食。有北不受。萬世之下。且有餘臭焉。而可使之列詞林。隨侍從。重遺清班之辱乎。德溥盜詞畢具。諒已無地自容。臣亦何樂有言。第恐看議者不察。或聽其委罪於良材。借名於鄒四。以遂其詭脫之計。且臣曾待罪中城。前項情形。知之頗悉。不敢不據實上聞。皇上或以賊證旣真。法難輕宥。而正其竊盜之辜。惟命。或念其廁名講幄。姑從寬典。而移之不齒之列。亦惟命。臣無任惶悚恭候之至。

摘陳漕政疏

題爲奉差事竣。摘陳一二緊要事宜。以振積習。以裨國計事。臣受命催餞。一歲將周。因前歷覽河防。備閱漕誌。間嘗有概於中矣。祇見前此漕臣。催餞事完。多有條議。言者近於循規。聽者視爲故套。雖經部覆。奉旨允行。其實遵行者十一。而廢格者十九也。臣亦何樂多言。以取畫餅之誚。惟是事有積玩。當振權有掣肘。難行。臣旣不安於心。何敢不聞於上。因不揣愚陋。條爲四款。用備採擇。如蒙皇上。不以臣言爲謬。敕下該部。覆請施行。其於漕計。未必無補也。臣無任惶悚俟命之至。一、訓練漕卒。以防不虞。竊惟國家挽漕用軍。而統之以材官。總之以勳帥。蓋示寓兵於漕之意。爲慮至深遠也。邇來承平日久。此意浸微。官軍全不知兵。敵器咸屬戲具。此在平居無事。旣不思爲未然之防。一遇中途有警。將何以禦卒然之變。是不幾於以漕予敵哉。如正德年間。流賊出沒江洋。糧艘大半煨燼。此往事可鑒已。矧今島夷匪茹。震鄰之恐甚切。



礮徒潛伺。腹心之患更殷。一切防禦事宜。誠不容緩。臣見旗軍外水中強健者甚多。若教以步伐。角以藝能。總計全漕。可得勝兵十萬人。但器械責以自備。恐疲軍力有難支。終屬具文。無裨實用。似當官爲處給者。如蒙敕下該部。咨行漕運衙門。通行七省直兵糧道。查議動支何項官銀。將所屬衛所。每幫辦給牙旗五面。每船給鋒利大刀二件。長鎗二件。銃礮二桿。弓矢二副。務期件件可用。併在船鑼鈴鼓吹。置立文簿。歲令運官交接稽查。督責旗軍。時加修整。仍聽巡漕御史。督責各把總運官。或遇守閘阻風。乘暇訓練。教以擊刺之方。作其勇敢之氣。如是則隨幫有備。到處皆兵。無事則爲鳴榔擊楫之夫。有事則爲荷戈挽強之衆。無論漕糈永保。而折衝亦有賴矣。此在平時。尙當講求。其於今日。尤爲急務。誠不可泄泄緩視之也。伏祈聖裁。一、速興河工。以備新運。竊惟黃堦塞止之議。河漕二臣爭之久矣。頃該臣等奉旨會勘。先行據司道議報。謂欲塞新口。必大挑正河。而後水有所容。欲復正河。必竟河築隄。而後保無復決。計費非一百二十餘萬金不可。此用必塞之說也。又謂欲用小浮橋。必開兩河口。而後全河可來。欲開兩河。必隄山西坡。而後水無旁溢。計費非三十餘萬金不可。此用不塞之說也。二說各有攸當。持議原未歸一。臣會同總河尙書楊一魁。巡鹽御史楊光訓。督同濟甯道按察使龔勉。徐州道按察使徐成位。河南管河參議王嘉謨。親至決口之處。相度地形。審察水勢。謂舊河見在可因。何必旁尋蹊徑。以幸不可知之功。陵運但保無虞。何必力挽全河。以窮不可繼之費。始議展挑對灣接口之處。補築南岸缺窪之所。間有淺阻。量爲疏通。行之一時。運道獲攸往之利。積之日久。全河有恢復之機。利多害少。費省工倍。爲陵寢運道之計。似無便



於此者。此則臣等酌諸說之中。爲一定之畫。再四籌度。衆議僉同。而後敢會疏以聞於上。維時總漕尙書褚鈇。雖曾移書約會。辭以瘡疥未行。卽其人智高一世。豈能坐照於千里之外。無怪其惑於異同之見。而猶有二三之說也。卽今伏秋已盡。轉眼新運將及。不乘此時作速興工。左牽右掣。迄無成畫。儻臨期誤事。誰任其咎。卽如今歲河道淺阻。臣雖至愚。亦安能舍河臣。而責備於漕臣也。旣經該部議覆。再行會議。臣等亦何必執前說之爲是。惟祈敕下漕臣。無憚遠涉之勞。一至決口之所。公同總河。躬親相視。則順逆難易之勢。了然在目。不必借聽。而異議自消。事功可立舉矣。若今日治河之病原自有在。而黃堦之塞止不與焉。夫黃河善淤。從來遠矣。故沿河州縣。俱設有淺夫。原爲挑河而設。如夏鎮額夫一千二百五十四名。徐州額夫三千五百一十六名。邳州額夫八百三十五名。雖他處夫數不同。總之計道里遠近。以爲多寡。自足供一處挑河之用。使當水落灘見之時。卽率前項夫役。於灘淺所在。逐段挑深。俟伏秋水至。衝刷一空。黃雖善淤。安得數十年間。河身遂高與城齊也。惟是前此治河者。創爲束水滌沙之說。歲增長隄若干丈。歲築掃壩若干處。卽謂治河得善策矣。而不知此朝三暮四之術也。所謂束水滌沙者。果遂能滌之。以歸於海乎。無論旋滌於此。復停於彼。且河水暴發。併前隄壩。盡化而爲河身矣。此與載土實河者何異。河身安得不日高也。蓋由河官以挑淺。則用力勞。而無可見之績。築隄則取效速。而有可紀之功。所以相率日習於非。而不自覺耳。如蒙敕下總河大臣。督行各管河官。除水漲冰凝之候。卽率各處之淺夫。挑各處之河道。總河但時加稽查。勿令虛曠。則河道不日深通。而壅徙之爲患者。臣不信也。伏祈聖裁。一。清船額



數以杜虛冒。竊照各衛運船額有定數。廠旗造船議有定價。載在議單甚詳也。間或風濤漂損。尙云拯救難施。亦有風夷浪靜。循河而行。稍有擠挨。應聲碎裂者。比比而是。凡此皆由料價剋減太甚。工匠製造不堅故耳。如杭州衛二十三年新造船隻。適遇減存。次年領運。卽稱釘板解散。不堪裝載。此該省帶管糧道王之麟。親以對臣言之。殊爲可恨。然此猶就有船者言也。至有年限已過。拆板盜賣。而不送廠改造者。有領支料銀。衛官分費。而畢竟無船者。幸遇減存。彼此借移。一經派運。輒稱灑帶。夫以朽腐之舟。行江河之險。加以米多船重。風浪難敵。淺溜難挽。其不淪胥而覆沒者。亦幸耳。嗟夫。數百石之糧。十軍之命。係於一船。可任其敝壞。一至此哉。如蒙敕下該部。咨行漕運衙門。轉行七省直督糧道。通查所屬衛分額船若干。見在堪用若干。其損壞不堪。及缺數未補者若干。查議應動官銀補造足額。督造委官。務擇精明廉幹者充之。仍將委官及工匠姓名。造刻船尾。遇有漂損。申報總漕。及巡漕御史。官匠姓名。一併開報。果係風濤不測。情或可原。如係製造不堅。概議參究。若損壞數多。該管糧道亦難辭責。庶責成旣嚴。人心知做。工料保無冒破。而儲糈亦少漂流矣。伏祈聖裁。一照舊更番。以蘇官困。竊照漕例。印運更番。一以均勞逸。一以圖料理。載在令甲。永爲定規。各省通行。萬口稱便。至萬歷二十四年。漕司條議。掌印運糧。三年一換。意爲更番不如久任之專委。一年不如三年之考成。爲計未嘗不善。但就人情論之。印運更番。原爲先期料理。下年運務。一年一更。則掌印官視新運爲自己事。一切料理爲甚急。三年一更。則掌印官視新運爲他人事。一切料理爲稍緩。與其三令五申。責令整理而不足。孰若思患預防。使人自爲計之爲善也。且各官負



錢糧之重。冒風波之險。跋涉經年。危苦萬狀。而不得一時之休。亦非情矣。又查單例開載。漕糧十日開倉。十二月完兌。開幫稍遲。參罰有例。今各官有上年冬初赴運。次年冬盡方回者。舊事未完。何以整新運。里門未入。何以速完兌。人情事理。種種未便。查得該部議覆。謂山東遮洋二總。道里頗近。相應改令三年更換。餘俟人情稱便。不妨再議。蓋已知其難行矣。今山東遮洋二總運官。衆口一詞。僉稱不便。何如仍舊之相安也。再照印運更番十三總。同此一例。獨通州衛官。視印屯爲奇貨。經營到手。牢不可易。領運隨幫。胥用無籍。乞丐當之。及侵費官糧。盜賣船物。以彼赤身窮棍。何所追償。漕法之壞。至此極矣。是更番之令。通行於七省。而獨格於通衛。誠不知其何說也。如蒙敕下戶部。轉行漕運衙門。將山東遮洋二總運官。照舊更番。通州衛運官。一併更番。庶勞逸適均。政體畫一。而漕政爲益舉矣。伏祈聖裁。

議補科道疏

題爲差缺勢難終廢。時窮法有當通。懇祈聖明。酌議陞用。以濟時艱事。我國家建官。六卿握政本之司。臺諫專糾察之任。六卿失職。臺諫得以議其忠邪。臺諫失言。銓卿得以行其黜陟。彼此相維。大小相制。立法之善。前代無比。使委任得人。職業無曠。祖宗之天下。雖與天無極可也。邇來皇上乾剛獨斷。政柄躬操。內外羣工。鮮能稱旨。員缺不補。遷轉不行。實有厭弃臣下之意。臣謂官職不稱。惟選擇其人則可。並廢其官。則不可。且以御史一官。舊稱重任。卽今皇上所使爲肅吏安民。紀功錄罪。有一不責成。按臣者乎。故當此天災人怨之時。倭橫盜窺之際。方內晏然。無敢越志者。徒賴此數輩紀綱之使在也。乃今在內中差之缺。



一十有六兼攝止有五人。在外中差巡歷二年。竟無一人往代者。意氣消靡。進退狼狽。所望於徵召之典者。不啻農夫之望歲也。近見邸報。在外有司年久的。亦既奉旨陞用矣。是行取不可遽得。員缺又難終已。臣反覆思維。尚有一說焉。夫舊例行取。諮訪參之衆論。考選不厭再三。厥典誠重。第羣數十人而取之也。其驟集闕下。若見以爲多。其遲至歲月。又見以爲少。差遣不敷。催請甚難。則何如隨缺陞用之爲便也。見今科道缺官。宜卽於內外相應衙門中。選擇老成正直精明端亮者。隨時陞用。如此人數無多。既不患遴選之弗精。有缺卽補。又不患任使之久廢。儻委用不效。則每歲年例之推。五年考察之典俱在。誰得而私之。此雖一時通變之權。較之黜陟不明。賢愚同滯。其爲功效實相萬也。如蒙皇上不以臣言爲謬。祈敕下吏部覆請施行。其於用人圖治之機。未必無補矣。臣無任惶悚竢命之至。

### 議併河漕設巡撫疏

題爲河漕分督未便。巡撫兼攝非宜。懇祈聖明。順時更制。以利轉輸。以安重地事。臣惟國家倚漕河以轉運。設督撫以保釐。均重任也。顧官有宜合而不宜分者。分之適以滋掣肘之患。有宜分而不宜合者。合之適以貽叢脞之憂。語曰。瑟之不調。更弦可彈。車之或蹇。易輪乃安。處今日之時勢。而思以拯救之。亦更弦易輪之會也。臣試爲皇上詳言之。自國初文皇定都於燕。始命平江鑿渠淮浦。灌輸京師。厥任甚專。嗣是以功臣子孫長於紈綺之間。不可獨任。方命都御史王竑出總漕運。兼理河渠。河漕原未分設也。間值河有他故。特遣大臣行視。圖方略治之。事竟還朝。正德以來。猶旋設旋罷。而總河專設。則自尙書潘季馴始。



矣。迄今十有餘載。河道顧日以不治。其故何也。蓋治河猶禦夷也。帝王之於夷狄。每治之以不治。惟河亦然。時有潰決。則堵塞之間。有壅淤。則疏濬之。如是而已。自總河既設。職有專司。居常無事。恆恥績效之未彰。每懷尸位素餐之懼。興作無當。可惜帑金之妄費。祇貽畫蛇添足之譏。如先任總河二臣。或築隄壩。以障淮流。或鑿性義。以分河勢。蠹費冒功。言之可恨。至於今日。其患又異是矣。一柄兩持。戈矛互生。謀惡不出於己。功惟恐歸於人。或此有所敷陳。在彼多方以撓其議。或彼有所規畫。在此百計以阻其成。共事已成。冰炭之形。屬僚漸分左右之祖。金錢空擲。輸輓益艱。詬厲日形於封章。禍害乃遺之國家矣。然則何如。漕河歸一之爲便也。蓋漕以河行。河爲漕設。名本相因。事亦相涉。若得其人而兼理之。將委任既專。事權斯一。當局無越俎之嫌。旁觀免築舍之議。其便一也。號令不分。奉行無二。杜諸司承望之私。消大臣分爭之隙。其便二也。漕爲專職。河爲兼官。居恆但檄所司以疏通。遇患方乘暇日以巡視。絕徼功之念。省糜費之端。其便三也。夫以不便如彼。而其便如此。亦何事拘束故常。而不爲一議兼任耶。然此亦有說焉。蓋總督漕運。至爲煩瑣。而又加以巡撫之任。一人之身。百責攸萃。拮据尙難。又何暇出其餘力以治河耶。嘗考先年倭寇侵犯維揚。曾從御史馬斯臧之請。專設巡撫於揚州。後因倭寇寢息。復歸併漕撫。初猶駐劄揚州。後遂漸移淮安。而海防始日弛矣。今島夷大舉。海氛甚惡。顧茲維揚。繫陵京之屏蔽。當漕運之咽喉。商貨萃聚。倭素垂涎。儻揚帆內指。此中實爲首犯之衝。恐非總計之臣。所可遙制而坐策者。今議漕河既併。有難概責以巡撫之事宜。專設巡撫一員。令駐劄揚州。或通泰之間。使之整搦兵馬。簡練軍實。專爲戰守。



之圖。期建安攘之績。查昔年原設巡撫衙門。見在揚州。稍加修整。即可駐劄。無煩創建。其勢又甚便也。或者謂漕臣必藉巡撫之權。方可行漕運之事。不知漕臣統轄七省。其巡撫所屬者。僅江北四郡耳。其他湖。湖吳越之間。宋梁幽薊之地。固撫治所不及者。漕令何嘗有不行耶。況穿渠轉餉。以裕萬年之積貯者。河。漕之任也。事相關也。開府建牙。以圖一鎮之奠安者。巡撫之任也。權不相涉也。今一換置之。而官不增。設費不重加。政體人情。俱爲全利。亦何憚而不爲之。臣非不知循默可以無過。易置未免招嫌。第曰擊河。漕之決裂已甚。武備之積衰可憂。不得已而爲是。曲突徙薪之議。若失今不圖。一旦患生。叵測圖之。其有。及乎。如蒙皇上不以臣言爲過計。祈敕下該部。速議施行。國計幸甚。地方幸甚。臣無任皇悚待命之至。題。

### 議處科場疏

爲京闈錄士大謬。禮官持議未平。祈敕部院。從公看覆。以信明旨。以服人心事。竊以文體之醇漓。關士風。士風之邪正。關治化。邇來文體敝壞。屢屢宸綸。申飭釐正。不啻再三。而其敝乃益甚。良以禁令止屬之空。談革懲未見之行事。以故忽明旨而不信。玩禁例而不遵。法之不行。自上始耳。有如今歲北闈取士。乖謬。實多。業經科臣疏參。奉旨看議。該部知仰承德意。遵例議懲。以儆將來。誰曰不可。奈何其不盡然也。臣請。得而詳言之。如吳應鴻。鄭棻。文理怪誕不經。徑議革斥是矣。第據該部之所指摘。文中疵語。則邱夢周。張。蔚然。安在。爲應鴻與棻之次也。趙士騏。鄭宏材。安在。爲夢周蔚然之次也。曹蕃。趙名言。又安在。爲士騏宏。材之次也。乃該部於夢周蔚然。則曰姑免斥革矣。曰終身不許對制矣。夫所謂不許對制者。將令其衣巾。



以終身乎。抑尙許其入仕乎。儻許入仕。則固依然入彀之英也。何以云重懲也。於士騏宏材。則曰限六年。部考定奪矣。於蕃與名言。則曰待論定而議罰。又曰限三年。部考定奪矣。夫所謂部考者。非覆試之意乎。頃奉明旨。不必覆試。恐滋弊也。而顧欲覆試於三年六年之後。其弊尙可言乎。且其覆試也。將虛應故事已乎。抑尙酌其去留也。如有去留。則視不許對制者。不尤重乎。何輒概云量懲也。至謂曹蕃爲庸謬。而不屬險怪。似與名言俱在可原者。臣查督學校士。文理疵謬。當在降黜之等。豈不可爲諸生者。而顧可列高魁之選乎。又部疏前引新奉欽依申飭科場事宜。內開文理險怪不經。及荒謬不堪者。奏請革斥。主考等官。分別罰治。今蕃與名言。非所謂荒謬不堪者乎。何自言之。而自背之一疏之中。首尾不相應也。況洗改關節。均屬可疑。而考官之被調。亦以曹蕃與汪泗論之故。論既定矣。又何說之可原也。夫禁例在前。公議在後。而諸生甘自蹈之。卽照例議斥。原不爲過。儻皇上加意憐才。不忍遽棄。暫示裁於今日。尙需效於他年。則發學肄業。以待再試。實皇上加惠之盛典。曠蕩之深恩。非臣下所敢與也。至於考試二臣。則猶有可議焉。夫順天主考者。全天敘也。副考者。焦竑也。論關節則罪當。各坐所由。論文體則罰宜。先及主者。今觀禮官之駁參。及部院之平議。係文體之疵謬者居多也。取士如此。衡鑒謂何。卽天敘之辯疏。亦曰五經俱臣涉筆。金榜俱臣登名。此真語也。今在竑旣已甑破。天敘何獨瓦全。縱言者偶遺。彼獨無愧於心乎。旣不與竑同調。亦當量行議懲。庶爲公平正大之體也。如蒙皇上不以臣言爲謬。乞敕下部院。再加參酌。邱夢周等應否與吳應鴻鄭棻並議裁懲。主考全天敘應否量議薄罰。從公議覆。仰候聖斷。庶明例不爲虛文。



公道不至澌滅。而掄材重典。爲益肅矣。臣無任悚息待命之至。

參處府佐疏

題爲府佐患病回里。職任久虛。乞賜議處。以重官守事。臣奉命督理兩淮鹽法。揚州乃其駐劄之地。受事以來。值該府知府陞轉。通判降調。管河江防同知二員。一督工徐邳。一分署瓜洲。府署官僚。缺乏殊甚。乃清軍同知王以孚。亦以抱病行矣。使本官患病未久。或雖久病。而尙未離任。臣亦可以無言。查自二十四年十二月。臣以僂運經過揚州。見其口眼欹斜。觀望甚爲不雅。文移舛錯。志意業已全墮。猶意其一時偶病。或調理可愈也。旣而本官因解木被訐。前病轉加。隨具文乞休。而道府諸臣。稱其年力尙強。操守無壞。令其在途調理。痊可速來赴任。不謂本官輒徑飄然長往矣。及今半年之外。尙無履任之期。該臣看得朝廷因事建官。日月不容少曠。人臣奉公守職。去住豈可自由。況揚州路居南北之咽喉。地當商賈之輻輳。江洋爲鹽盜出沒之藪。海口爲倭寇入犯之衝。頃蒙皇上軫念重地。創設撫臣。以圖永奠。法度更新之始。正官僚整飭之時。凡一切清戎實伍。輯盜安民。胥係同知專責。今以孚疾病旣已纏綿。煩劇豈堪負荷。且其在籍已久。就列實難。是尙可不爲議處。而久虛員缺。以待哉。爲照揚州府同知王以孚。履任雖無大過。抱疴惜其難痊。經年偃臥私家。豈是當官之義。名位空懸。宦籍甯無竊祿之羞。宜令投閑。免遭重戾。或念其病體非係衰殘。易地尙堪驅策。則量調簡僻。以責後效。是亦愛惜人才之意。在該部酌議上請。非臣所敢定擬也。如蒙皇上不以臣言爲謬。乞敕吏部。再加參酌。將同知王以孚。准照有疾致仕。或量調簡僻。遺



下員缺。速爲推補。庶憲度有常。官職無曠。而地方深有賴矣。

乞復用人舊制疏

題爲士氣消靡日甚、世風淪壞堪憂、懇祈聖明、深維遠慮、修復用人舊制、以勵臣工、以回泰運事。竊以自古君雖神聖、不能獨運而成功。則用人爲之先矣。況九卿股肱之任、臺諫耳目之司、用人之中、尤爲重要。進退消長之間、關治亂興衰之數、不可爽也。故必九列無虛位、而後濟濟師師、爭效靖共之誼。一有不法、納言者得持文墨、以議其後矣。亦必科道有常言、而後審審諤諤、各輸匡桀之忠。一有不當、秉衡者得據先資、以課其殿矣。夫如是、故賢姦易判、用舍不淆、朝無倖位之夫、野鮮留良之嘆。斯端拱之化成、而無爲之理得也。乃今日之用人、則有不然者。卿貳十五虛席、部院強半代庖。員且不充、人奚暇擇。此在平居無事、已非所以昭明良之盛、隆喜起之風。一旦國家有事、求可爲排難解紛、持危定傾者、果誰其人哉。有如昨歲兵部侍郎邢玠、不先補任、東事告急、經略需人、廷臣寥寥數員、恐亦難其任矣。故與其拊髀於臨時、孰若儲材於平日。皇上念及於此、則九卿員缺之補、何可緩也。至於科道秩固清華、責亦艱鉅、非謂人人皆可勝任者。今見在者不與其出、何以昭勸懲之公。應選者不與其入、何以盡英賢之用。惟勸懲不行也、將譏彈得憑其胸臆、而國是愈淆。惟英賢不錄也、將臺諫祇取爲具員、而忠讜日遠。此理勢之必然、而朕兆之已見者。無論非朝廷建官之意、恐於皇上求省煩言、息議論之心、亦甚拂矣。況臺臣職主糾察、東西南北、惟其所使。有如昨歲御史陳效、不先補任、驟承欽命、選使監軍、卽欲那借別差、安得朝令而夕行也。



故與停取而任其消磨。孰若精取而嚴其殿最。皇上念及於此。則科道員缺之補。何可緩也。夫股肱不可缺。耳目不可廢。黜陟不可不行。賢愚不可同滯。事理易見。功效相遠。以皇上聰明聖知。夫豈無辨於此。乃諸臣請之益力。皇上持之益堅。其故果安在耶。意者以卿貳高爵重祿。未肯輕以與人。故苟可兼攝。不必於備員也。又以科道沽名取譽。逆耳厭聞。故難其進退。以示裁抑也。臣皆以爲不然。蓋爵祿名譽。人主鼓舞豪傑之術也。惟上縣爵祿以待士。故挾材抱德之英。咸思附日月之末光。建鼎鉉之大業。而國家方賴其一臂之用。有如上愛其爵祿。則下愛其所學。將寄迹於考槃。韜光於衡泌。士高嘉遯之節。朝貽播棄之名。不信仁賢。誰與共理。雖有爵祿。將焉用之。且臣下惟恐好名之不真耳。夫責難陳善。名曰恭敬。排姦斥佞。名曰忠直。使人臣皆能好名。以堯舜事其君。而竊附於恭敬忠直之義。顧不休與不然。獻諛希榮。黨邪伐正。此不好名之尤者也。國家亦安所賴於是。臣而用之。二者相提而論。孰得孰失。孰僞孰真。宜有分矣。皇上念及於此。則九卿科道之補。又何可緩也。臣抱此懇誠。久思獻納。第恐言詞拙納。不能感動聖衷。故遲回至今。竊見人才日益凋耗。議論日益繁淆。不勝杞憂。冒昧進言。以干天聽。伏乞皇上廣求端亮之賢。盡補卿貳之缺。而以糾彈付之納言。慎選忠直之士。用實臺省之員。而以進退付之公論。蓋皇上深居穆清。臣下臧否。其勢不能盡知。若夫開誠布公。集思廣益。愛惜人才。以共維國是。宰相蓋與有責也。皇上職要。惟爲天下擇一相而已。儻員缺不補。考課不行。用舍供其好惡。賢愚聽其消長。將使爵祿不足勸。名譽不足矜。人習僥倖之風。士無砥礪之氣。而人心世道。竊莫知所終也。伏願皇上留神省覽。臣無任懇切悚



慄之至。

議通鹽法疏

題爲淮鹽額地日促、浮課日增、商困已極、引壅難售、懇祈聖明、及時拯救、以裕邊儲、以圖永利事。臣猥以  
譚才、受命督理兩淮鹽課、當此工役未息、征調繁興、凡可益課通商、以佐主計者之萬一、實臣之分、亦臣  
之願也。顧今兩淮鹽法、敝也極矣。夫其敝也有源、而其通也有漸。苟不疏其源、而冀其流之通、雖使劉晏  
持籌計然、決策恐亦難以善其後也。臣試備舉顛末、爲皇上言之。夫淮鹽之利、甲於天下、惟其行鹽地方  
之廣耳。逮後日侵月削、漸失其初。如江西之南贛、吉安、湖廣之衡、永、郴、寶、皆改行廣鹽矣。河南之南陽、僅  
存舞陽一縣、餘亦改行解鹽矣。地去而課存、其故已不可曉。况今之淮課、又非往日之故額乎。往日淮鹽  
歲額七十餘萬、原有常股存積之分。邇來無論邊情緩急、概爲開中矣。往日正鹽、每引不過二百觔。今則  
加以餘鹽挑河等項、每引五百五十餘觔矣。夫額地之減者、已三分之一、而浮課之加者、反數倍之多。鹽  
法安得不稱壅。商人安得不稱困也。見今商人已納餘銀、守支未掣者、積引三百餘萬。儻由此而不再加  
增、三歲之積、率以爲常。尙恐難繼。奈何各邊工本之引、又日加而無已也。豈未悉夫加引之爲害耶。蓋凡  
此攘攘負販之徒、皆爲利來也。稱貸資本、計日起息、以冀贏餘之入。今納銀於三年之前、挨賣於三年之  
後、盼望掣期、不啻農夫之望歲。一旦令新中者、反得而超越焉。彼獨何心。詎能甘乎。且歲額行鹽、止有此  
數。既賣於此、又賣於彼。是罔利之術也。掣鹽既已無期、餘銀又不容緩。嚴刑苦逼、剝肉醫瘡。是劫奪之政



也。商資既虧。漸圖改業。歲課百萬。徵辦何從。是俱困之道也。主計者。儻爲國家計久遠。何不念及於此哉。該前任御史楊光訓。目覩加增引目。萬分難繼。疏請停中。已經該部議覆。斷自二十六年。許爲停止。亦已灼知其害矣。乃時未及停。復加違沒舊引。突至一十七萬。近遼餉。又加三萬矣。此二十萬引。不知將安消受乎。臣查淮南歲額。定鹽八單。其實止行六單耳。淮北歲額。定鹽四單。其實止行三單耳。餘未行之單。皆壅積之數也。自昨歲京掣新復。適遇前項違沒諸引。附搭掣賣。多至二十餘萬。足抵兩淮一季之數。故今歲正月。又當春掣之期。據督摺委官呈稱。商人因前歲掣鹽過多。堆積江廣。不能銷賣。今掣期已迫。不肯承買。差人拘提。俱閉門遠避。乞行改委等因。該臣多方招諭。定之以期限。威之以刑罰。必竟遷延。違逾一季。直至四月。掣驗始完。蓋地方有限。食鹽有限。前有一引之加。則後有一引之壅。此理數之自然。無足怪者。夫一歲之中。已積一季。長此不已。將安底極。故臣以爲加增引目。萬萬所當暫停也。夫加增停矣。僅不益甚其壅耳。而見在積引。亦終不能銷。臣日夜思維。求所爲疏導之策。莫知所出。如割地不能復矣。存積不可望矣。勛重不可減矣。獨禁絕私販一節。尙在可行。除近在江北。臣督責所司。設法禁戢。已不遺餘力矣。其遠在江廣河南。臣巡歷不及。人心易玩。且兩省司道。舊不相屬。而兩廣南贛軍門。俱得而節制之。勢有遠邇。便分向背。昔年割去地方。大率由此。今所恃以共事地方者。獨鹽法一道耳。有司藉口便民。鹽道鮮能任怨。以致私販充斥。視爲當然。如湖廣荊州一府。在附府江陵數縣。尙食官鹽。其夷陵長陽等處。爲私鹽所阻。官鹽曾未一至其地。湖省如此。江西更甚。是淮鹽額地。明割者三分之一。而暗侵者。不知其幾



也。雖有年終查參之例。不過就一府總計。以此縣之多。補彼縣之少。僅完八分以上。冀免參罰足矣。此二分未完之數。卽前所謂每歲壅積之數也。當此國計虧拙。課額阻滯之時。安可因循故弊。不爲破格一處。臣看得州縣戶口之增減。生齒之繁耗。每數十年而一變。舊定鹽額。間有當更。今宜行令各省鹽法道。督各府州縣掌印巡鹽官。通行查議。某處銷引溢額。今宜加引若干。某處銷引足額。今宜照舊。某處引全未銷。或係道里不便。作何搬運。或係私鹽阻隔。作何禁戢。亦必計口授鹽。定以引數。比照舊額。有增無減。限兩月以內。酌議明白。造冊送臣。以憑按冊發鹽。照數銷賣。凡兩淮見在行鹽地方。務期盡食官鹽。以圖漸復年額。儻仍前怠玩。借言民利私鹽之賤。諉以私販遏捕之難。非係忘情國計。必是才力不及。聽臣差滿。照例摘參。重加罰降。將見責成旣嚴。斯奉行知謹。待至數年。行有成效。積引漸銷。再議加增。亦未爲晚也。臣前之所言。是爲探本窮源之論。後之所言。不過補偏救弊之方。必源本旣清。而後補救有效。不然。加者無已。銷者有限。區區劑量。所濟幾何。亦終歸於決裂。而不可支也。逮其不支。然後起而拯救之。則其難更倍矣。伏望皇上軫念國課之重。深維永久之圖。祈敕該部。再加查議。除未銷甯遼新增引鹽。仍照齋到倉鈔勘合。派支挨掣外。自今以後。徵兵措餉等項。一切勿加淮鹽。其消導積壅。從臣所議。速爲覆允。行臣遵照施行。庶淮南之積困漸甦。國家之經賦可久。而臣亦藉手以稱塞於萬一矣。

議撫臣駐劄疏

題爲酌議巡撫駐劄要地。以適重輕。以便彈壓事。頃因河道多艱。倭情孔亟。仰荷聖明。倦焉南顧。俯採廷



言併河漕以一事權。設巡撫以固戰守。詔令一新。軍民胥悅。謂從此運道可保安流。海邦永有藉賴矣。第河漕大臣駐劄淮上。乃南北輸輓之中。淮黃交流之會。糧運方輿。則專駐淮安。以董漕事。糧艘甫過。卽往來徐邳。以理河渠。事勢便利。經久可行。無容更議矣。惟是撫臣駐劄之地。有不可不爲審擇者。該臣會同巡按御史周盤。查得昔年開府。初設揚州。良有深意。間或謂揚州地當衝要。過客往來。應酬不便。臣前審察未的。亦未敢定執其詞。致今遂有移駐泰州之議矣。及臣巡歷地方。相度形勢。詢稽輿情。有萬不宜然者。何敢顧忌隱忍。不爲明白盡言之。蓋今日撫臣之設。雖云海防爲重。實則以撫綏而兼軍馬之任。凡四府三州。幅員千里。皆宜周顧。非如司道偏裨。僅守一隅已也。若揚州則四通八達之區。五方雜處之地。財貨輻輳。姦宄叢生。儼然東南一巨鎮也。雖平居無事。尤須重臣。以資彈壓。卽有倭倣。南可以壯陪京之門戶。北可以固陵寢之藩維。東北急。則可以應廟灣。東南急。則可以制通泰。左右策援。靡不如意。且開府舊制。規模甚壯。輪奐猶新。而中軍衙宇。司府廳舍。依然俱在。不費一緡。不勞一力。蓋天造地設。以待有今日之舉者。若泰州則其義何居哉。卽以維揚一郡形勢較之。府治屹然上游。稍入而東南百餘里。爲泰州。揚州道居焉。再入而東南二百里。爲通州。副總兵居焉。撫臣居中調度。輕重適均。前人經畫。委曲周至。無以加矣。若撫臣移駐泰州。無論闔署營壘。百無一備。勞民動衆。煩費騷然。甚失原議設官之意。且將與該道同城乎。則勢不足以容。儻移該道於揚州。是道臣居其中。而巡撫居其外。道臣處其重。而巡撫處其輕。名義倒置。舛亦甚矣。若謂揚州之衝煩。不如泰州之簡僻。不知撫臣體已尊貴。往來應接。原自無多。若道臣



名位稍次。則應酬之煩。不更甚乎。且避煩囂而尋幽靜。此惟志在山林者可耳。若巡撫何官。保釐何任。固將詰武揚威。容民蓄衆。顯然與兆庶相昭揭。顧可託之無人之境。遊於寂寞之鄉哉。無論事理未便。恐亦非所以爲名也。况交際一節。亦自無難處者。該臣等看得授館穀以勞過客。郵吏所有事也。充庭實以媚顯者。明例所甚嚴也。且行者迫於王程。誰願流連於道路。守臣自有政務。奚取委婉於將迎。惟在明旨一加申飭。而前弊可盡釐矣。新任撫臣。端方清正。作法宜自今始。豈其以一時應酬之靡文。而忽百年經久之遠略也。必不然矣。撫臣受命建節。駐劄便利。宜聽自擇。第旣已奉敕行事。恐有避難之嫌。臣等聞見。旣真謀議且確。不得不代爲具題。不然。恐舍已成之故業。圖不急之新工。徇一人之便安。違輿情之僉望。則民未見其利。先見其害。財用空耗。怨咨且興。臣竊知其不可也。此舉也。官民上下同然一詞。臣若不言。將來亦必有言之者。及言之而事已垂成。勞費已不可償矣。伏祈敕下該部。酌議覆請。行令新任撫臣。仍駐揚州。其泰州衙門。免議營建。再祈天語。申飭在外撫按。各修本等職業。不得無事交接宴會。以妨政務。庶弊宿除。而衝地經久可行。規制定。而重鎮保釐永賴。今日設官之舉。斯盡善而無弊矣。臣無任皇悚待命之至。

議舉營田疏

題爲營田創始。要在得人。懇祈聖明。卽任獻議之臣。期責必成之效。並酌留鹽引。以襄盛舉事。竊自島夷煽禍。環海戒嚴。兵食告乏。在在皆然。而江淮爲尤甚。蓋鳳泗之間。祖宗陵寢在焉。且漕粟四百萬。由此以



達京師。饑資百餘萬。賴此以供邊餉。而本地緩急。曾不得藉其絲毫之用。是語勢最重。而不得不防者。無如此中。乃語時最困。而不易爲防者。亦無如此中。先是撫臣條議增兵借餉。章凡數上。今兵已集矣。業收之營中矣。而尙莫知餉之所從出。斯時也。已集之兵。散之不可。存之不能。爲淮海慮者。眞計畫無復之矣。臣偶從邸報。見工部郎中樊兆程。陳說河道事宜。而概及營田之議。蓋緣本官初令贛榆。已行有成效。近復奉差駐劄安東。督濬海口。三年之間。留心計度。所見必眞。非鑿空漫談者比也。臣閱其疏。稱鳳泗徐淮之境。可耕之田。豈直千萬餘頃。又稱清安一帶。直至贛榆。六七百里中間。荒地不下數百萬頃。且指畫地形。確有實據。今卽不能悉如所言。但於千百之中。得其一二。每歲當有數十萬金之入。以此治河給餉。豈非國家莫大之利哉。該臣會同總理河漕尙書楊一魁。巡撫鳳陽等處都御史李銖。巡按御史周盤。看得營田之制。廢也久矣。邇來忠計之臣。談者非一。迄未覩有成效。或者有可耕之地。而無其人。則招徠之難。或者有願耕之人。而無其具。則督責之難。凡此皆由廟堂無必行之畫。臣工鮮能任之人。是以奉行祇屬具文。議論竟成畫餅耳。今皇上誠銳意舉行。宜卽將兆程。改授屯田職銜。使督率所司。設法經理。假之便宜。以專其任。限之歲月。以考其成。蓋渠業已言之。則奉行必力。且其才智幹濟。又足以辦此也。猶恐銓司以官非舊設。不從所請。臣等於此。蓋嘗熟計之。查得安東海口。舊無分司。祇因前歲本官有挑濬海口一疏。遂經總督河臣題授今職。原議事竣。停差。今本官三歲功完。造冊具報。業已無所事事矣。先任漕撫尙書褚鈇。曾議題革。改設道臣。旣因請告。遂復中止。今若改爲屯道。事體更宜。且本官任逾六年。俸加四品。



官階亦適相當也。况衙門如故。役使如故。供費如故。官雖由於創設。事無待於紛更。嗣是儻河道少阻。不妨兼督濬之役。卽海警時傳。亦可藉彈壓之重。俟數年之後。屯田就緒。議留議革。悉聽聖裁。無所不可。果何惜此而不爲也。夫官誠專設。任事有人矣。將專恃募民開墾乎。而淮徐之間。頻遭水患。所在蕭條。甯有餘力。卽官給牛種。能有幾何。計必召商。事乃可濟。臣查淮鹽積引二百餘萬。以十分計之。淮南十九。淮北僅十一耳。已行運司議將南引量改淮北。無使有偏滯之患。祇因南北餘鹽有五錢七錢之異。故查議未定。今宜免議改撥。止將淮北鹽引量加三萬。召商開墾。輸糧報中。就令鳳陽巡撫出給倉鈔勘合。關領引目。下場收買餘鹽。照例掣賣。應納餘課。亦留本地。爲營田工本之費。定以三年爲限。使鹽法無阻。前項引價餘銀。悉歸戶部。儻鹽法稱壅。徑議停止。則其端旣開。庶窮民有所依附。而就耕者必衆矣。又恐計部以鹽法無礙。不從所請。臣等於此。亦嘗熟計之。蓋引係加添。旣非分正課之所有。且及期還部。反以增正課之所無。果二三年間。積儲稍裕。則漕糧餘課。可不再煩請留。實可佐主計之籌於萬一。又何惜此而不爲也。臣職司鹽筴也。而議屯政。方慮引壅也。而議留引。非故不憚煩瑣。以取多言之誚。第眞見江淮根本重地。視他藩省不同。萬倍當防。而民生困敝。兵食匱缺。又非如他省之猶可加派者。儻兆程之說。果行。誠國家無窮之利。方地永賴之福也。第官非專設。而欲概責於郡邑。或兼攝於司道。則必不可行。卽設有專官。而不量留鹽引。召商開種。亦必不可行。臣待罪地方。目擊其事。誠不忍漠然坐視。令古今良法美意。卒湮廢而不可舉也。又何惜此而不言哉。如蒙皇上不以臣言爲謬。祈敕下該部。覆議施行。蓋議行而功效相



符則全享其利。卽議行而功效不逮。亦不見其害。想大臣忠誠體國。計必有以悉此矣。臣無任懇切待命之至。

### 催補司官疏

題爲運司空署委任乏人。祈賜速補。以重鹺務事。據運司經歷司呈。承准本司照會。准署印判官張問明。關稱見患足疾。調治不痊。鹺務煩重。又兼徵解餘銀。病體實難料理。乞行改委。并催補運使等因。呈詳到臣。除批令暫假調理。照舊視事外。該臣看得兩淮運司額設官四員。一切稽引督鹽通商裕課。皆於運使是賴。而同知副判。又各有齎捧解銀。捆掣驗放之責。卽使備員不缺。尙爾輪委不敷。頃自大察汰斥之後。僅存判官一員。鹺務浩煩。已難兼攝。況今春夏餘銀起解在卽。乃判官張問明。又以病請矣。一時司署並空。無人堪代。夫部解旣不可緩。印務又不可虛。臣於斯時。亦莫知所爲計矣。先已兩次揭催。迄今未見推補。豈銓部偶遺之耶。抑求之未得其人耶。竊照兩淮鹽課半天下。蓋利藪也。非操持狷介者。難以絕苞苴之嫌。亦弊藪也。非局幹精明者。無以著綜核之效。屢經諸臣建議。咸欲選任以重其事權。優擢以旌其勞勩。誠以國計邊儲。所關甚鉅。今且懸缺半載。並代庖無人矣。前任御史楊光訓疏稱。運職名重實輕。彼一時也。豈料其一至此極哉。臣猥以庸愚。叨膺簡命。督理淮課。夫所謂督理者。督責司官經理也。故一法之行。必經運司查議。一令之布。必經運司轉承。今並司官無人。又安所施其督責。臣若因循不言。儻缺官廢事。國課有虧。皇上以頓命罪臣。臣將何說之辭。伏乞皇上軫念兩淮鹽課重鉅。視他司不同。敕下該部。將



運使同知運副及泰州分司判官速爲銓補。勒限到任管事。而運使一官尤選擇精明廉幹者充之。庶經理得人而鹺務不致曠廢矣。

懇請停遣中官以維鹽法疏

爲淮鹽絕無積存。諸臣大肆欺誑。謹據實陳奏。祈賜詳察。以破奸謀。以維國計。事。臣於本年七月三十日接邸報。見鴻臚寺主簿田應璧一本。爲有聞入告。掣積鹽收時價。以助大工等事。據稱此本於六月初七日封進。未蒙批發。想皇上已洞照其奸矣。乃應璧奸謀未售。具本復催。奉聖旨。目今中外多事。經費浩繁。且不忍加派小民。這所奏沒官積鹽。既有搭放變價舊例。就差所奏內御馬監左少監魯保前去。會同彼處巡鹽御史及地方官查明變價。解進內庫。以助工費。不許隱匿阻撓。寫敕與他。該衙門知道。欽此。臣一見之。不勝駭異。竊念方今兩宮肯構。九域徵兵。主計之臣。日夜持籌。東搜西括。恨不得嘔心吮血。以供額外無窮之費。向使兩淮運司。果有積鹽。何所吝惜。而不爲變價。以供公家之用。衆商果真知場有積鹽。何不具告戶部。及臣衙門。而專謀之應璧。且擅請中官。以開無窮之釁。此其故安在。蓋緣事無影響。謀出朋奸。有萬萬不能從者。臣試先言兩淮鹽法之害。而後指羣奸規奏之由。皇上幸垂察焉。夫兩淮歲課七十萬五千一百八十引。此係竈丁額辦輸官。專待邊商報中。內商守支之數。但海畔蕭條。竈丁窮苦。流離轉徙。逋欠常多。往往商人告迫。經年監比。鬻兒變產。折價難完。儻有積鹽。早已補支盡矣。況正引之外。甯遼諸邊。新增引目。每歲不下二十萬。皆無正鹽。聽商買補。儻有積課。豈不告支。又昨歲戶部以大工缺費。計



無所之。搜尋淮司遠年違沒老引十六餘萬。召商認賣。引價餘銀。共徵二十萬兩。解部助工。各引鹽觔。亦係買補。儻有積課。又豈不告支。凡此在諸商不過投詞片紙。在臣等不過援筆一批。便可了當。有何難事。而應壁詭云。運司無暇料理。御史席不暇溫。將誰欺邪。應壁銅臭之夫。固不知天下萬世之有公議。然所以敢爲欺誑而不顧者。亦有所以使之矣。目今兩淮鹽法。敝壞已極。不在場司之無鹽。而在行鹽之難售。蓋二三年來。邊方增餉。戶部助工。兩淮引價餘銀。舊稱一百二十萬。今實漸至一百四五十萬矣。夫行鹽地方有限。食鹽戶口有限。豈有神輸鬼運。遂能消化之速如此。蓋新引日益。則正引日壅。以致商人納銀歲久。掣鹽不前。資本漸虧。積苦難控。而奸人罔利。每每鑽求。希圖超掣。今春京城市棍。借口淮鹽。獻兵獻餉。實繁有徒。幸賴聖明。置之不聽。乃日久計生。復賄買應壁。轉換言詞。冀爲必售之術。駕言內工之助。謂奸謀儻遂。夤緣得行。將藉彼假虎之威。以肆其貪狼之性。凡商人納銀守支之課。皆得指爲沒官。凡商人及期應掣之單。皆得任其撓越。奸猾得志。良善墮心。從此邊商裹足而不前。則芻粟之飛輓難繼。而戍卒時虞其脫巾。內商挾貲而徙業。則帑庾之積貯日詘。而司農愈憂其掣肘。邊情國計。利害匪輕。且應壁之詭詞。旣曰餘鹽堆積如山矣。又曰令商買補足額。將所謂如山者安在邪。旣曰專指沒官積鹽矣。又曰每歲附搭十四萬。將商鹽歲歲沒官。若許邪。轉換支吾。不可方物。豈其誤聽而誤言之。其意將使闔豎布滿於要地。利權盡操之奸人。汚辱聖化。搖亂人心。天下國家之患。將莫知所終也。邇來利孔一開。獻礦獻稅。應如影響。諸臣執奏。盡託空言。臣又何敢煩瑣。仰瀆聖聽。第國家鹽課。所關重大。非僅僅礦稅之比。蓋開



礦樵關。雖不便於閭閻。尙無損於國計。若鹽課則外實九邊。內供庶府。一經廢壞。整頓愈難。臣叨蒙任使。職掌攸關。知而不言。罪將滋大。爲是不得不披瀝於君父之前也。昔主人有洿池。以爲利者。行人過而見其魚鼈之物也。謂之曰。我善漁。主人喜。爲之具網罟舟楫。資其行。則趨而之。其池曰。我於是乎漁。主人蹙然曰。吾爲子能取江湖之魚。以益我也。若是。則吾固有之矣。而焉用子爲哉。今淮課百五十萬。以供軍國。莫非皇上之固有。應璧乃借言進獻。而欲反因之。以爲利哉。臣謂若應璧者。宜服上刑也。皇上試加省察。如以臣言不謬。祈敕戶部。核實具覆。停中使無名之差。正應璧欺誑之罪。果工費不給。責在司農。凡四海貢賦。皆皇上所有。令多方湊處。自無缺用。無聽一人牟利之私言。而壞累世經久之大計也。臣無任激切懇祈之至。

再陳中官不宜干撓鹽政疏

題爲中官漸干鹽政。微臣竊抱杞憂。謹瀝血誠。冀回睿慮。以杜亂萌。以保泰運。事頃田應璧本以錢虜汚流。受人雇倩。僞指積鹽誑上。實乃朋比營私。皇上未暇詳察。遽允所奏。徑遣少監魯保前來兩淮。變價解進。風聞傳播。遠邇交駭。在廷臣工。合詞執奏。人情如此。事理可知。況臣待罪淮巖。驚憂更切。隨已核實奏報。恐尙未徹宸聰。臣仰窺聖意。或者謂積鹽旣係沒官。何妨變價。魯保情自願往。尤易責成。雖多參駁之章。恐爲過激之論。以故執之甚確。行之不疑。果如所云。是於諸奸欺誑之情。國家理亂之故。似猶未盡洞然者。臣前皇遽疏陳。又且剖陳未悉。聖心難格。固所宜然。謹罄愚忠。再干天聽。夫鹽者。民利之所在也。鹽



課者。國用之所需也。惟利切於民。故競趨之。孔實多。惟用關於國。故經理之法甚備。如兩淮三十場。各有場官矣。又爲設司官以分理之。每十場。各有分司矣。又爲設都運司以統理之。運使官階三品。秩等參藩。稱貴重矣。又特差御史以監臨之。大小相維。紀綱互紐。試觀前後。齟齬臣。諸所規畫。條例俱在。法制井然。如邊商主於報中也。惟糧草已輸。而引目難售。則爲之定搭派之規。內商主於守支也。惟餘銀已納。而鹽掣無期。則爲之停加增之目。水商主於運賣也。惟私鹽夾帶。而正課難消。則爲之嚴京掣之防。又恐商人乘機射利。中道遲留。鹽價騰凌。閭閻坐困。則又配之以州縣。定之以水程。所以爲民生慮者。尤惓惓也。凡此皆權利較害。酌盈濟虛。於修明法紀之中。寓調節均平之用。故二百年來。國計以充。邊儲無缺。雖一壞於正德之季。旋釐正於嘉靖之初。得失少異。興廢頓殊。以往徵來。毫莫之爽也。近因淮南引目稱壅。內商告病。屢經臣等題請。戶部議覆。暫停邊增之引。以濟鹽法之窮。夫邊臣時方告急。計部豈不關心。顧暫減於一時。正期垂利於永久也。無奈地方奸徒。希超掣罔利。無隙可乘。欲蒙告之臣等。乃臣等之所請裁也。欲蒙告之戶部。又戶部之所議革也。計無所出。攢賄入京。串謀奸書。捫空瀆奏。止圖雇倩之利。罔懷軍國之憂。皇上誠洞燭其奸。卽置之法。豈不寒奸諛之膽。而愜臣民之望者哉。卽不其然。敕下戶部。轉行臣等。查明具奏。誰敢不實。奈何應璧之規。奏甫入中官。之特遣已行。戶部不得量其盈。詘臣等不得執其真僞。夫戶部乃皇上股肱之臣。掌邦國之賦者也。豈不若一例職之足憑乎。微臣乃皇上耳目之司。叨澄清之寄者也。豈不若一闕豎之足信乎。重其職而疑其任。輕其人而假以權。賢奸倒置。用舍失宜。敗道傷猷。莫此



爲甚。且應壁之所指者。沒官積鹽也。聖旨之允賣者。亦沒官積鹽也。今據各場查報。場鹽並無沒官。彼魯保者。既已受命遠來。甯能空手回奏。必且別立名色。更尋事端。試觀臨行之條陳。已爲後日之張本。其曰鹽不足數。令商買補。是明知無官鹽也。其曰隨到卽放。不俟掣期。是明欲阻正課也。甚謂止給印票。不用關引。夫商人九邊報中。運司投鈔。南京起引。往返萬里。豈故好煩。國家創法。良有深意。所以示鹽法之重。而杜假冒之端也。若印票便可通行。則引目可置無用。且本地近便。誰甘邊塞之勞。超掣利多。孰樂守支之苦。以若所爲。不至舉成法而盡壞之。舉邊餉而一空之。不止矣。此一鹽法也。憂國奉公之臣。百計維之。而不足。懷私逐利之輩。一言壞之。而有餘。興言至此。良可痛心。且臣奉使兩淮。專理鹽法也。既宦官居中用事。定知掣肘難行。有如投託奸徒。公然夾帶。臣能一爲禁治乎。有如商民告困。法當變通。臣能一爲調停乎。卽今聚賄營求。奸棍數輩。俱在揚城。姓名可指。然且負嵎之勢已成。倚社之奸難索。何論其後也。蓋執之則嫌於忌器。徇之則適以曠官。然則自今以往。將視憲臣如贅疣。而等三尺如土苴矣。豈直鹽政。卽皇上近差中官。抽稅關隘。皆原未設官管理者也。向使見在權關。已設有部臣。再益以中使。一柄兩持。又何能爲。理勢自然。初非難見。今遣使業已在道。不敢卽望召還。惟願皇上渙發綸音。明諭魯保。令遍歷鹽地。躬自檢查。果有沒官積鹽。固當盡數變價。如係無影規奏。許令遵旨回朝。勿得另有乞陳。干撓鹽政。儻果內帑空乏。急在需財。不妨特敕戶部。轉行鹽司。酌量加增。以助工費。庶雖壅阻於一時。尙可補救於時日。不遂至一壞而莫之挽也。雖然。此猶以利言也。若臣之所慮。則更有大焉者。蓋嘗歷覽古今。博觀載籍。



甯有國家務財用。而蓄害不至者乎。甯有闒宦干政權。而禍亂不生者乎。況鹽筴與民爭利。本爲厲階。故邊海鹽徒。通江興販。十百爲羣。敵傷官兵。歲無虛月。然旋就擒捕。未卽爲害者。徒以法紀昭明。官軍用命。故也。一聞寺人干政。物情必且駭疑。轉生厭怠之心。易開鼓煽之隙。儻有持大澤之槌。弄潢池之兵。一夫大呼。千人響應。何以禦之。卽幸而剿滅。已傷天地之和。脫致蔓延。甚非國家之福。是其大可慮者一也。國之所依者民。民之所依者財。邇來屬國兵連。閭閻膏竭。徵斂日益。科索無休。遠近騷然。人心愁嘆。岌岌乎若累卵之危矣。皇上惻然軫念。不忍加徵。聖言及此。是百姓之德也。第天之生財。止有此數。凡屬國家經費。錙銖皆自民間。茲因防海添兵。餽餉不給。山東兩直。已加派矣。況此歲額。齟齬資均屬九邊正餉。此有一分之入。則彼有一分之詘。迨乎軍士絕食。豈能束手待變。設非益賦。出辦何從。是不忍加派者。祇爲空言。而不免加派者。乃其實事也。海禽微物。情僞尙知。億姓含靈。豈無恩怨。恐民心旣失。外釁易乘。土崩之勢。漸成瓦解之形。立見是其大可慮者二也。臣聞惟名與器。可以勵世。惟賢與德。可以服人。故國家建官爵。以稱德。位以序賢。貴賤有章。大小不紊。以此相制。人心帖然。從古及今。莫之改也。若以掃除之役。撓有司之柄。恐賢良聞之解體。豪傑莫不墮心。除非猥瑣庸流。方能俛仰從事。官常日亂。寵賂斯彰。諸臣以聚斂爲嘉謨。宵人以掊剋爲善計。煽汚俗於天下。叢怨謗於朝廷。八柄潛移。四維盡裂。天下之事。殆不忍言。此其大可慮者三也。由此言之。則今番舉動。不獨國計盈詘之所係。實天下理亂之攸關。是當審圖。未應漫視。不然。使事苟無傷。言猶得已。臣待罪淮上。已踰三時。行且及瓜。計當弛擔。因循緘默。豈不便於身圖。阿



諛順承。尤可保乎聖眷。何苦而汲汲如是哉。所懷者。國家之隱憂。所不敢溺者。朝廷之職掌焉耳。又非不知成命已出。反汗爲難。第思改過不吝。成湯所以貽謀。唯言莫違。孔子用之垂戒。臣區區犬馬之忠。亦惟願皇上以成湯爲法。而無蹈孔子之所戒也。臣言雖鈍。臣念無欺。願霽天威。少垂睿照。地方幸甚。國家幸甚。



# 蘭臺奏疏卷二

## 乞裁察無沒官鹽疏

題爲鹽法干係匪輕、齟臣持論有據、懇乞聖明、亟賜裁察、以重邊儲事。奉都察院勘劄、准戶部咨、該本部題奉聖旨、這沒官積鹽、係原奏官稱變價解進、以濟供用、今據地方官揭辯、兩淮絕無、如何這等互異、便著差去內官魯保、會同巡鹽御史、督同經管運司等官、作速查明具奏。戶部知道。欽此。欽遵。移咨備劄到臣。該臣遵奉、會同御馬監左少監魯保、督行運司等官、徧查兩淮三十鹽場、並無沒官積鹽、取具各場官吏及守支衆商結狀在卷、猶恐查報未確、臣請再以事理之最顯明易見者、爲皇上言之。淮引每歲開中七十萬、乃視場課以爲準、非有盈縮之不同也。況鹽引原不相離、使鹽果沒官、未有不先沒其引者。自前歲戶部助工、搜尋運司滄消、違沒老引十六萬餘、乃三四十年以來所積、數已盡於此矣。中間所稱滄消者、乃官課已納、支鹽出場、偶遭水火不測、消化無存、方追引銃毀、此項約九萬餘引、無鹽可沒、不待言矣。所謂違限事故、未行支鹽者、僅七萬餘引、歷今三四十年、節題蠲免、補支消折、甯有未盡、以此觀之、益知查報之非虛也。見今場司所存者、不過商人納銀守支、壅阻待掣之正課耳、是可以爲沒官乎。皇上一垂睿覽、則有無虛實、其情立見矣。再照國家鹽法、九邊報中、南京起引、固所以節飛輓之勞、杜假冒之弊、乃



其最要者。尤以邊塞寒苦。非人所居。借引招商。填實邊地。庶使軍民有所倚附。而封疆乃可守也。祖宗規畫何等深遠。國家關係何等重大。故其設官也。既有場司以分領之。又有運司以督理之。自司道以至府州縣官。皆有專責。法已詳矣。非有未盡之利也。而猶責御史以監臨之。若曰。是皇上法紀之臣。勢要不得撓。利害不能惑。爲能革弊釐奸。通商裕課。維其法於可久焉耳。非賴聖度冲虛。神明洞燭。特俞部請。責令查實。則國家二百年邊計。幾壞於田應璧之一言。儻異日貽患疆場。仰煩聖慮。實自臣待罪兩淮始。負職之愆。卽萬世之下。猶難追矣。此臣一聞查明奏報之旨。所以喜而至於忘寐也。臣復思淮鹽旣無沒官。正課又當壅滯。乃目覩工費缺乏。凡爲臣子。孰無急公之心。查得前該戶部因鋪宮餉兵。錢糧缺乏。題奉欽依。行令各直省。凡有拖欠逋負。并積餘貯庫。及可省銀兩。盡數催徵。檢點解進等因。轉咨都察院。劄付到臣。已行運司。備將司庫銀兩。開報戶部。其給商解京食鹽餘銀。割沒之類。凡係銀兩。各有正項。但目今國家多事。難以拘守常規。合無敕下戶部。將前項庫貯銀兩內。酌量緩急。那湊數萬兩。令差來內臣。押解回京。以濟一時之急。雖司庫已虛。而法紀未壞。責令接差御史。多方處補。猶可拯救於將來也。況三奉明旨。責令變價解進。與查明具奏者。俱指沒官積鹽也。但恐內臣見沒官無鹽。懼於涉虛。心懷疑畏。旣不得言。有又不敢言。無別挽事端。冀圖撫飾。或指納銀守支之課。以爲積鹽。或執買補搭單之詞。以壅正課。有一於此。將鹽政遂壞。而邊疆大事去矣。非臣所忍見也。除內臣魯保恭候明旨外。至於田應璧奏事不實。而本內所引商人傅國等。又俱隱匿不出。應否究議。統候聖明裁定。



祈究處貪官疏

題爲司官貪肆異常、紀綱大壞、懇祈聖明、亟賜究處、以儆官邪、以重巖政事、竊惟運司之設有分司也、專以督課爲職、責任頗重、邇來率以援例監生充之、此輩自知前途不遠、一行履任、輒爲拔本之計、卽有卓然自振者、千百中之一二也、詎意復有市井無賴之尤、如通州分司判官李同春者、出於其間乎、臣試以穢鄙之狀、爲皇上陳之、臣今歲四月、巡歷通州、同春到任方始、見其顛言嚙語、如醉如狂、臣曰、此膏粱之氣習也、時值運司缺官、批委齋捧、輒挽生員數人、進院保留、臣曰、此奸狡之故智也、奉委未行、輒與武官爭權、有司爭體、揭辨紛紛、臣曰、此乖戾之妄人也、及齋捧回任、更不思所職何事、但見十日一揭事、五日一問安、種種狂謬、俱非本分所應爲者、臣以履任不久、且未知其操守何如、姑爲置之、及臣滿期在邇、行據道府開報云云、臣謂其到任尙未及期、何遽狼狽至此、蓋且信且疑焉、故暫留之、以備復命之用、不意同春不自揣量、尙營謀徵解餘銀、冀勒取羨耗、逞貪心於一擲也、九月間、據運司呈請、委官徵解餘銀、惟時運司止有判官羅元、係正途出身、屢經揚州兵備道按察使曲遷喬揭稱、本官操持廉正、商心允孚、故於該司呈詳批云、秋季餘銀、准委羅判官作速徵收、及期起解、繳業已發司矣、次日本官同揚州知府進見稟稱、前銀李同春說要徵解、懇請改委、臣竊怪其妄稟、厲語責之、本官方不敢言辭矣、向不知同春謀差未遂、公然挾阻、不容徵收、延及兩月、而報完者、未及十分之一也、偶一日、同春具告病公文一角、內夾三揭、其一揭稱職得罪兵道者一、得罪總兵者二、得罪有司者三、得罪武弁者四、其一揭開不肖把總一



員及強盜十八名。其一揭舉薦把總三員。各開考語數句。夫同春職止催課。別無所事。何得罪者如此之多。且臣並未委以賢否。此譏彈稱薦之揭。何爲而至哉。已將告病公文并三揭批道查報矣。又遲之二日。同春棄任。越三百餘里。輒入府城矣。夫一面告病。一面具揭。又一面入城。其故殊不可曉。時揚州道進見。始言同春爲解銀不得。在外爭阻。羅判官苦欲告辭。因日前本院面斥。不敢復稟耳。臣隨令巡捕官喚同春進見。詰問其告病入府之故。時伊已飲酒酣醉。輒先敍其門第之盛。交遊之廣。復言每徵解餘銀。約有羨餘三千兩。應以酬職齋捧之勞。今被羅運判爭得。破除此官。何所不至等語。臣益不勝駭異。謂同春以白丁納粟。叨冒一官。得與入賀之榮。獲躋觀光之列。且勘合往返。肩輿續食。復領盤費銀一百二十兩。何以爲勞邪。往時關茸司官徵銀勒羨。每每招議。故臣擇賢而委。正欲痛革此弊也。而同春乃云。例有三千兩羨餘。以酬齋捧之勞。若以爲分所應得者。是尙知禮議廉恥。紀綱法度爲何物邪。豈曾聞四海九州入賀之官。俱有三千金之酬邪。卽市井乞丐之徒。雖中藏穢鄙。猶撫飾於言詞。有如此之顯然無忌者邪。卽此觀之。益知前者道府開報。無一之非真也。有官如此。尙可不急爲參處。以需報命之期哉。該臣參看得。運司通州分司判官李同春。行同狗彘。迹甚穿窬。剝利盡錙銖。窮竈抱剝心之苦。櫻情得羨耗。同僚遭攘臂之兇。履任未及一年。穢迹已盈衆口。官常大玷。憲典奚容。伏乞敕下吏部。覆議上請。將李同春行臣衙門。提問明白具奏。或念其任淺。姑照貪例。革職爲民。遺下員缺。另行銓補。庶貪頑知儆。而紀綱少振矣。

乞查究僞印巨奸疏



題爲僞印巨奸、難容脫網、乞賜查究正罪、以昭法紀、以清驛遞事。先據廬州府呈詳、據金斗驛申稱、萬曆二十六年九月初五日、奉兩淮察院填、兵部良字三十五號小勘合一道、於本年八月十五日、給舍人王寵、吳大金等、前往湖廣地方、貴州、南直隸、蘇州、浙江等處、公幹支口糧三分、陸路中馬四匹、包馬二匹、水路站船一隻、同行三人、自派河驛來、遵依撥馬應付間、該驛丞江中柱、查得勘合內部印糊塗、本院印信篆文互異、及查領差日期不遠、隨弔應付底簿查閱、本舍並未經過、又據本犯執稱湖廣人、由本地而來、情似可疑、難以應付、申乞查檢等因、到府、隨行合肥縣查理去後、續據回稱、查審間、據湖廣寶慶衛鎮撫歐之文呈、爲分豁便益、早賜完解、以免負累事、內稱、職係寶慶衛掌印鎮撫、於七月內、蒙寶慶府并布政司委解南京二十四五年匠班銀兩、農桑絹疋、又奉軍門給發公文二角、俱赴南京戶兵工三部投交、有親曾在淮揚巡按、念途遙遠、給與勘合一道、應付等情、該本縣審得勘合內舍人王寵、吳大金係虛填名目、止有本犯義男一人、歐進生同行、並拘到官、驗得勘合內年月印信、委果不明、當將所解錢糧、逐一查明外、但勘合必須申送鹽院對驗、方知真假、其解部銀兩絹疋、本府仍差殷實的當快手一名、并行金斗驛、揀僉馬頭一名、伴送本犯義男管解、前赴南京各衙門交納、掣批迴銷、再行審理等因、申府、該本府看得所執勘合、無論印信模糊、篆文差謬、而內填王寵、吳大金名目、前往湖廣、貴州、南直隸、蘇浙等處、公幹似與歐之文部解錢糧、止至南京交納、大不相伴、除錢糧差快、協同該驛馬頭、押令本官、前赴各部、驗明交納完日、仍將本官發與各役帶回再審、其勘合果否真僞、乞發明示、以便遵行等因、到臣、該臣查驗、隨



批云。勘合原非本院所給。且聽差舍人。並無王寵吳大金姓名。及驗部印糊塗。院印全假。其爲僞雕無疑矣。仰府候錢糧交完。嚴究招解。內歐之文。仍查果係寶慶衛鎮撫。卽參呈前來。此繳批行去後。續據該府呈稱。蒙臣批詳。遵照間。案蒙南京戶部劄付。爲分辯事。湖廣清吏司案呈。奉本部送。據寶慶衛鎮撫歐之文呈稱。奉差解銀絹公文。投部。行至金斗驛。驛丞江中柱。不與馬匹。嚇求未遂。喝捉監禁。捏稱勘合假印。乘機竊去盤費銀五兩三錢。懇乞作主等情。送司。查得先據廬州府申文。批差民快劉銀、劉儒、馬頭董彥章、竇催印等。押解犯官歐之文。并伊家丁歐進生到部。乞要交割錢糧事完。將各員名發回審究。招詳等因。案候間。今據呈稱前事。該本司看得金斗驛驛丞江中柱。申歐之文。勘合假印。事干重典。必推勘得確。庶可按法施行。該府所欲得原官發回審詳。亦爲有見。但歐之文。係武職官。例須參提勘問。恐難遽擅禁錮。且本官奉湖廣撫院布司差齋批文。投南京戶兵工等部。見有銀兩絹疋文冊可據。則與棍徒平空騷驛者不同。其勘合借名。或係推恩憐恤。或係轉買違禁。猶須行彼省合干上司。便於鞫問。若仍押發廬州府羈審。萬一歐之文等。異鄉伶苦。不幸傷生。無論不服其心。彼省且謂本官爲解錢糧。勞苦王事。而反以得禍。本部忽不加意。該廬州府得無亦任其咎。驛丞江中柱。有無嚇求不遂起爭。及竊去銀兩等情。本司難以遙斷。合無請乞備云事情。移咨各巡撫。聽徑查究明白施行。抄由咨部查考。稟堂奉批。據申。及本官所告。以武弁而借用勘合。罪何所逃。但奉差解京錢糧。其情不無可原。且本官亦例應參提員役。合行該府具申該省上司。并勘合發回。就便查參定罪。庶於情法兩盡也。奉此。案呈到部。劄府。卽便具申湖廣布



政司將原來勘合黏回查驗。是否真假。及從何給付。聽其就彼查問下落。具由報部查考。蒙批該本府看得驛禁森嚴。節奉裁省支費。以充軍餉。乃歐之文敢於藉口解銀。而用僞印勘合。其罪已浮於平人。且所解者止南京錢糧二百金耳。勘合內填往貴州直隸等處。又將安之。得非棍徒假詐。遍誑驛遞。以充谿壑乎。況同伴六七人。一見驛丞盤詰。遂各潛走。劉知縣密拏。當堂檢開皮囊。始知有起解錢糧批文。故議押解納完。究問今奉部文。錢糧交完。人發原籍。此爲之文脫網計耳。驛丞捉獲假印。當以功論。反誣之嚇求竊盜。如復有之文之流者。驛官箝口結舌。而不敢問矣。驛遞何由得清。錢糧何從減省。奸棍亦且橫肆無憚矣。請乞批發寶慶府。嚴提究罪等因。復詳到臣。而人犯徑被該司釋放回籍。不容原人帶回矣。該臣看得歐之文原執冒名勘合。部印無文。院印木刻。其爲假雕。一目可知。且填寫數省。道路迂曲。冀圖騷擾驛遞。冒支口糧。擅騎馬匹。旣經盤獲。法當追究。以正厥辜。該府因錢糧未交。多差人役。押解納完。帶回審究。是猶以部體爲重也。乃南京戶部司官。不知何所見而故縱之。蓋之文等所犯。乃假印也。非止借用也。乃重辟也。非止小過也。該司公然託名爲轉借無妨。代言爲勞苦當恤。且謂該府不能無咎。肆爲恐嚇之詞。以爲解脫之地。不思該府具文申部者。謂何差人押解者。謂何。豈其無據而然邪。卽云例應申參。亦當連人帶回羈候。顧可任情縱放。聽虎兇之出於柙邪。司官朦朧以呈堂堂官。據呈以批放。竟使僞印巨奸。夤緣脫網。論事則爲孟浪。據法則爲曲庇。無一可者也。且係隔屬人犯。臣衙門難以拘提。除將假印勘合。封送兵部外。相應具題。伏乞敕下該部。查驗覆請。轉行湖廣巡按御史。查照疏內情節。逐一究問明白。正罪。



庶法紀昭明而奸徒知戢矣。

再陳無沒官鹽疏

題爲鹽法干係匪輕。竊臣持論有據。懇乞聖明。亟賜裁察。以重邊儲。事。項者。田應璧希圖超賣。以侵鹽利。故妄指沒官積鹽。誑惑聖聽。臣欽遵明旨。會同內臣魯保查明具奏。因奏中情詞隱顯互異。致塵復查之旨。臣聞命驚惶。罔知攸措。竊念淮鹽之無沒官也。不惟臣知之。人人知之。卽內臣魯保亦明知之。但有謂有無謂無。乃人臣勿欺之義也。是臣之所可信也。不明爲有。亦不明爲無。乃內臣嘗試之詞也。非臣之所敢出也。不然。堆鹽乃露積之物。黃巾壩在跬步之間。有何難查。而猥云不知也。旣奉旨復查。臣強邀魯保躬歷黃巾壩等地。堆鹽處所。親行查閱。且懸首告之令。嚴隱匿之罰。已兩閱月矣。而所謂沒官積鹽者。竟歸烏有。謹再矢日矢心。從實會奏。諒不能復爲兩可之辭矣。儻再有異同。臣請敕下撫按。或另遣科道二員。前來查勘。如臣所奏不實。甘當欺誑之罪。無辭也。況兩淮鹽政之壞。不在場司之無鹽。而在浮課之日益。臣前疏已明言之。且恭誦明旨。有云。勿得虧損正課。有礙邊餉。儻如田應璧與保之原奏。則票鹽一行。引鹽必壞。旁門旣啓。百弊叢生。正課邊餉之害。莫此爲甚。必不得已而取之。每引帶鹽十斤。歲徵銀三萬餘兩。尙不至甚潰於鹽法之外。但一二年後。亦必難繼。且二十七八年引鹽。俱已捆完上堆。若挨序加鹽徵銀。當在二年之後。無論緩急無濟。且鹽政重務。能久堪此羣奸之蠹壞乎。臣議將秋季餘銀。那借數萬兩。令內臣魯保押解回京報命。勒限三年。補完部額。庶幾兩全而無害。但羣小方欲內臣久駐維揚。以爲



奸利之窟穴。臣何敢必其可行。惟願皇上敕下戶部。虛心酌議。當必有長算矣。臣待罪兩淮。鹽法乃其專職。既奉旨會查。何敢不同心協力。以求國事之濟。奈內臣之於政體。原非所知。不得不聽憑於積奸。況此積奸。又卽賄買。規奏之人也。心知沒官無鹽。恐不符原奏。謂必於會查未奏之先。別尋事端。聳動聖聽。方可以飾其欺誑之罪。而遂其罔利之謀。故初行會奏。不言沒官有無。而止云假以時月。容令商人買補搭單。冀一得俞旨。羣奸便有所憑藉。以行事矣。及奉旨復查。前謀未售。後計愈工。初議指先年賣過遠消引目。商人獲利。欲補追其價。不知此事題奉欽依。銀解鹽掣。事已久完。何有找價之理。臣詳辯別疏。可閱而知也。又因靈璧縣商人程時通。被告私鹽五百二十引。臣批海州查勘。乃引鹽非私鹽也。業駁行淮徐道覆查矣。羣奸遂視爲奇貨。不知本商誠不能無罪。然情節尙多可疑。法貴持平。必俟該道勘明。而後可定議。此胡可懸坐也。又如屢奉明旨。令查沒官積鹽也。而渠到揚兩月。行文運司。並無一字及之。三十場查鹽結狀。諱爲未見。一切文移。臣皆不省其故。及臣再四解諭。強邀查鹽。方發一票於運司。未五六日。而卽欲坐以抗拒不報之罪。不知三十鹽場。乃三分司掌行。一至該場。自有文冊。若運司轉行各場。相距千有餘里。文移往返。非二十日。豈能到。蓋羣奸意不在此。特欲強借以爲詞。彼行文日期。何可掩也。大都法之所禁。乃彼之所欲行。彼之所行。又皆法之所不載。彼實有恃。臣且奈何。故三月以來。狐鼠縱橫。商民汹涌。兩淮之事。決裂將盡。臣疾病危篤。旦夕難支。第念鹽政軍國重務。故願忍死以終其事。今力已竭矣。萬無能爲矣。獨念紀綱法度。皇上之所以治天下也。惟彼積奸。治亂不入其心。安危不關其慮。但知利己。罔恤



其他固紀綱之所不能維。而法度之所不能加也。臣不敢望盡法窮究。區區犬馬之愚。惟願皇上愛此紀綱。以爲治安之規。惜此法度。以爲社稷之衛。俾臣得以兩淮完美之政。還而奉之朝廷。是臣於無已之中。仰報皇上之職。分於萬一耳。不然。事有利於國家。惟聽之。有害於國家。亦惟聽之。皇上將何用於臣。而以御史名其官哉。臣心無窮。臣言難盡。懇祈聖明。軫念政體。關係委實重大。未可輕壞於羣奸之手。敕下戶部商議停妥。覆請定奪。是兩淮九邊萬世無疆之慶也。臣無任悚息待命之至。

乞敕察棍徒弄法疏

題爲棍徒乘機鼓弄。法體日甚凌夷。祈敕該部詳察議覆。亟賜緝究。以維憲紀事。竊以兩淮鹽法。自邊引增多。久稱壅壞。至前歲補賣。違沒老引十六餘萬。遂益大壞極弊。而不可救矣。不謂延及今日。益爲奸人壞政之謀也。事體猥瑣。本不敢仰瀆聖聽。但時勢至此。有不得不爲詳言者。蓋國家鹽政。備載條例。如邊商納銀五錢。報中一引。許支官鹽二百斤。及投鈔運司。復每引追徵餘銀。淮南七錢。淮北五錢。加以挑河賑濟等銀。准令買補火鹽。通前正鹽。共爲五百五十斤。是爲一引。運至行鹽地方發賣。間有官課已納。支鹽出場。或江湖遇險。鹽被消沒。當告臣等衙門。委官勘明。每引加罰銀七錢。不納餘銀。准照原引數目買補。續於後單掣賣。以救原本。又各商間有引鹽事故。違限掛掣者。淮南每引加罰銀二錢。淮北每引加罰銀一錢五分。准於後單補掣。此皆以示恤商之意也。若消沒引數不多。或查勘未確。不准買補。徑追原引。銃毀貯庫矣。及二十一年。戶部清查各運司歷年引目。賣過若干。追毀過若干。兩淮運司歷查



嘉靖四十年來。共追毀過引目十六餘萬。造冊報部。此項引目。乃納課在先。追毀在後。積棄無用之物。不在加罰買補之列。何也。蓋事遠人仁。當時犯法之由。皆不可考。孰爲當補。孰爲不當補乎。孰爲正身。孰爲假冒乎。揆之事理。無一可買補者。不意浙棍黃旻芳管煒等。探知前項引目。欲得乘隙邀利。假充引主。蒙告戶部。情願每引淮南認罰二錢。淮北認罰一錢五分。以助大工。惟時戶部正值財用缺乏。勢在然眉。不暇詳察。遂具題准行運司矣。該前任齷臣楊光訓。以爲非法。而不可從也。黃旻芳等知奸計不行。復告戶部。情願倍罰。該部又准行運司矣。前任齷臣猶以爲非法。而不可從也。方駁議未定。而戶部已將前銀作爲實數。兌給工部。爲採辦鷹木花石之用矣。前任齷臣謂朝廷需財雖急。但黃旻芳管煒等。旣非原引主名。安得冒加罰買補之例。如不得已。照邊增引價。每引一概納銀五錢。仍照例追徵餘銀。悉如新引之數。批行運司。懸令月餘。而前項棍徒。竟無一人投認者。蓋緣黃旻芳等。俱赤手窮棍。意謂奸計果遂。占引轉賣。坐獲不貲之利。及見定價五錢。已非所望。況部限甚急。安所得銀。前任齷臣乃出示召商。但納銀五錢。卽准認一引。給引之日。卽徵餘銀。未逾一月。而前銀盡完。及期解部矣。此二十五年七月時也。使非前任齷臣執法任怨。數萬國課。幾落於奸人之手矣。蓋緣鹽法利弊。惟齷臣知之。卽計部不能悉知也。不意羣徒營謀未售。怨恨不釋。管煒復於本年八月告部稱。前引如邊商管煒等認買。准照五錢。如係內商認買。再量加罰等因。夫前引乃無主毀繳之物。定照新引全價。召商認買。何分於邊內。況管煒等乃無籍棍徒。初非邊商也。在煒等則准罰五錢。在別商則仍欲加罰。何物神奸。敢弄法舞文。公然無忌。一至此乎。前



任。齟臣批云。違沒引一概加罰五錢。此其酌議妥當。一定而不可易者。若稍有異同。則弊滋無窮。而銀必不可得而完也。業已徵完矣。無容再議。雖部文復催。該司據實回報可也。批司覆部。而前事始定矣。前任齟臣見今在京。差內經手之事。必能道其詳也。比臣二十五年臘月入境交代。今年正月初八日抵揚州。尙有黃旻芳之夥棍黃正道。指稱在京營費。騙索衆商。告發運司。呈詳到臣。臣竊恨之。責治追贓。遞解回籍。而商心始爲帖然。蓋十月於此矣。今一聞中官之遣。前項棍徒百餘人。輒更易姓名。自京來揚。橫肆挾騙。兩月之間。紛紛投告。如黃立孝、黃時、黃鵬、錢登、盧夢麟等。或告找引價。或恐嚇商財。如有不遂。卽稱投獻中官。此輩若以臣等之法。能行於中官未遣之前。必不能復行於中官旣遣之後矣。世道至此。良可慨嘆。且此一舉也。屢經戶部題允。先據黃旻芳等之告。每引加罰淮南二錢。淮北錢半也。再准旻芳等之復告。每引加罰淮南四錢。淮北三錢也。今一概定價五錢矣。且戶部原准納銀帶鹽。先儘超賣也。今搭派於一年之外矣。夫以無主之引。比照新增之價。調停妥當。毫無曲徇。在朝廷因一時之急。偶開非常之例。在衆商圖速賣之利。預輸助工之資。疏請於計部。價示於齟臣。今銀已解矣。鹽已掣矣。而羣奸一旦乘負嶠之勢。逞倚社之奸。操柄在手。撥弄隨心。遂倡爲找價之說。果如所謀。是朝廷以召納爲騙局。而法令爲陷穽也。從古及今。有此政體邪。商人各有身家。各惜性命。卽敲扑之下。何所不得。恐兩淮從此無商矣。況鹽法所稱引價。淮南八錢五分。淮北七錢五分者。乃邊商輸邊五錢。輸賑五分。領引轉賣內商。守候三年。方有二錢三錢之利。非國課也。內商持引入場。得支官課。雖有二錢三錢之加。有鹽以償之也。豈與新增引



目立限追銀。無鹽可支者爲一例乎。且如邊商每引納糧五錢。而轉賣內商。有七錢八錢之異。則邊商引價亦當補追乎。內商引價餘銀鹽本。每引共費銀二兩五錢止矣。而轉賣水商。定價三兩有餘。則內商鹽價亦當補追乎。水商買鹽一引。用銀三兩有餘。而運至江廣。約賣五兩。則水商鹽價亦當補追乎。成化初年。邊價每引止納三錢五分。後增至四錢。正德年間。每引亦止四錢五分。今亦可齊其價而補追乎。蓋時勢有緩急。追徵有先後。腳價有多寡。守候有早暮。總期酌量情法。裕課通商。以維其法於可久耳。況前歲違沒之引。商人所省者。交易之費。朝廷所濟者。工役之急。而於國課正數。毫無損也。乃羣棍奸謀未遂。輒敢乘機鼓弄。株連蔓引。表裏爲奸。是棍徒爲政也。卽今淮揚城市。狐鼠公行。魍魎晝見。人心汹湧。景象非常。秋季餘銀。誰肯輸納。儻不嚴爲禁治。誠恐商人聞風逃散。儲計一空。雖有善者。亦無如之何矣。伏祈敕下戶部。詳加察議。黃旻芳管煒等。俱浙江棍徒。其始也。何爲假冒商名。以亂鹽政。其旣也。何爲倡言找價。以傾衆商。覆議請旨。行臣衙門。嚴行禁治。依律究遣。庶國體不至大壞。鹽政猶可少維矣。不然。以朝廷大法。臣倒持於奸棍之手。臣甯甘罷斥。必不忍以堂堂聖明之世。見有此景象也。皇上卽欲增鹽課以濟急。止當問之戶部。轉行齟臣。使之講通融之策。酌利害之宜。甯忍以祖宗二百年大政。壞之羣奸之手哉。更願皇上留神省覽。臣無任惶悚俟命之至。

懇乞回籍疏

奏爲家難驚聞、身病增劇、懇乞天恩、俯容回籍調理、以保餘生、以圖後效事。臣年四十二歲。直隸真定府



靈壽縣人。由萬歷十七年進士。除授山東青州府推官。蒙恩拔置臺員。初役都城。再役漕河。深以碌碌無所建明爲媿。二十五年冬。奉命督漕兩淮。時值鹽政壅壞之極。日夕圖維。冀得拯救一二。以仰副皇上裕餉安邊之至意。奈臣稟素孱弱。且南方風土。非所慣服。當五月巡行沿海。暑溼交侵。脾胃受傷。痰火大作。形氣漸消。然猶冀勉強竣事。歸而報命於闕下。故不敢稱病。延至八月。會有中官查鹽之旨。事出創見。中外駭聞。臣職掌攸關。義難推諉。故尤不敢稱病。今已兩次查明具奏。且巡事久完。旦夕望代。乃偶從京報寄到家信。臣祖母董氏。於十一月初七日。在家病故。臣危病之中。復遭此難。隻身二千里外。情實難堪。故兩月以來。日廢粥飲。夜驚枕席。肌骨已枯。真元盡耗。面容似瘁。鬢髮如霜。攬鏡窺形。不勝首邱之感。卽今展轉牀褥。呻吟痛苦。尙且不支。又甯能董治簿書之事。劬勤時事之艱哉。延醫張應元診視。謂積勞損神。積慮損心。若不謝事屏居。節勞省慮。恐非藥石所能治。臣有此疾痛。迫切至情。爲是萬不得已。而哀鳴於君父之前也。伏乞皇上垂鑒呼天至情。敕下部院核實具覆。容臣回籍調理。別遣臺臣一員前來更代。儻幸生還。苟延殘喘。則未填溝壑之年。皆圖效犬馬之日也。臣無任激切籲懇之至。

再陳會查鹽政疏

題爲遵奉明旨。再陳會查始末。及鹽政利害。仰候聖裁。以維成法。以安封疆事。頃者內臣魯保條議加罰存積二事。俱已奉旨允行矣。及戶部執奏疏上。復允行。臣查明回奏。仰見皇上兼聽之虛懷。從人之雅量。想亦洞知鹽政所關重鉅。非僅僅礦稅之比。故其慎重有如此也。臣謹仰體德意。酌利害之重輕。審事勢



之可否。明白敷陳。恭聽聖斷。夫先年違沒舊引。乃戶部因工費急乏。題奉欽依。轉行前任。齟臣懸價召商。今一旦補罰於既賣之後。恐無以示信於天下。但奉旨之日。已先出示嚴追。雖不便於商人。尙無損於國計。除候徵完。聽行恭進外。惟是沒官積鹽。使其果有。卽十萬之多。暫停正引。兩月之間。盡可變價。猶不至爲鹽政無已之害。臣何苦不爲將順。奈何田應璧所奏。委屬無影。臣安能昧心塗面。指無爲有。亦效其欺也。今內臣又舍沒官而談存積矣。夫鹽政七分常股。每歲開中。以供主兵之餉。三分存積。遇警開中。以供客兵之餉。此祖制也。後因各邊多故。二項並開。歲以爲常。豈惟並開。且加增新引矣。且補賣廢引矣。至加增補賣。俱出額課之外。遂致鹽法之壅。何至今日。而尙言存積也。查昔年齟臣。曾因鹽法壅阻。請停存積矣。曾因邊餉難缺。請發帑金矣。今存積常開。臣每欲比例疏請。而不可得。乃內臣顧反其詞。以爲證。益非臣所能知也。況場鹽有蠲。有折。十年之外。結絕淨盡。諸凡旁撫遠引。無過買補搭單。特難於顯言耳。若買補。何患無鹽。見今歲課餘銀六十萬。皆買補也。臣亦何敢再執。以取阻撓之罪。第害有所必至。不敢不爲預陳。以爲後日之驗。法有所當維。不敢不爲調停。以救目前之窮。臣試詳言之。皇上試垂聽焉。蓋兩淮煮海爲鹽。原無不足。特行鹽地方。食鹽戶口。各有定限。不能加也。譬之飲水於河。止於滿腹。腹旣滿矣。河水雖多。能復飲乎。今兩淮行鹽之地。固滿而旣溢之時也。卽有鹽。安所受之。此臣入境之初。急請減新增之目。非不欲增。勢不能也。蓋引減則鹽易行。而商樂附。商樂附則鹽價平。而窮民食鹽者衆。且私販不禁而自戢矣。其減。乃所以爲增也。引增則鹽日壅。而商本虧。商本虧則鹽價踊。而窮民淡食者多。將私販禁之。



而愈盛矣。其增乃所以爲減也。故裕課惟在通商。通商惟在便民。而通商便民。惟在調停於引日多寡之間。此理一定。毫髮不爽。今人但知此有一引之加。則彼有一引之詘。不知越單之弊。竇一開。累朝之成規。盡壞。加以奸棍藉勢行私。氣燄可畏。公行夾帶。復敢誰何。官軍斂手以避其鋒。憲臣吞聲以畏其螫。法紀蕩盡。私販充斥。正引不行。邊儲告竭。不知計將何出也。見今水商不肯赴儀買捆。內商不肯下場支鹽。竈戶停煎。生理斷絕。千百成羣。赴臣泣訴。人心皇皇。恐生他虞。臣明知力無可爲。只得出示安慰。目前如此。何論將來。況時勢洶危。日甚一日。且如無藉奸徒。將他商貨產。借手投獻而已。亦得以分其半。誰不願爲。兩淮之事。大抵不可爲矣。臣執奏再三。天威之下。實爲慄慄。非不知附和可以取容。遷就庶幾無患。第念臣言官也。巡鹽又其專責也。況國家鹽法屯田。相爲表裏。祖宗創制。最爲盡善。厥後歲改餘銀六十萬。以供軍國。爲利頗鉅。乃至今遠計之臣。著述之士。每扼腕屯政之壞。必追咎於餘鹽之開。臣幸立清明之朝。事虛懷之主。利害攸關。安忍不明白敷奏。輒敢輕議變更。使萬世之下。遂以臣爲亂法之首哉。伏乞皇上加意邊儲。准將加罰銀兩。追完報竣。仍留此鹽政。以垂永圖。此疆場之幸也。臣子之願也。如勢不容已。必欲增課。乞敕令戶部。將新增邊課。盡行停革。行鹽舊地。量行查復。再酌諸邊之緩急。審餉額之盈詘。裒益多寡。請自聖裁。非臣一人所敢擅也。蓋臣爲朝廷守法度。利害惟貴明言。司農爲國家主會計。彼此猶可調劑。職掌固有不同耳。臣家難驚聞。痛思成疾。旦夕難支。而復爲此喋喋不置者。誠恐以祖宗二百年良法美意。壞自臣始。不惟去有餘辜。卽死且不瞑矣。區區犬馬之愚如此。懇祈聖明矜宥。俯賜裁察。臣曷任



隕越待命之至。

撫安窮竈疏

題爲窮竈阡危、撫安無策、懇祈聖明、深思早計、以消亂萌、以奠宗社事。據兩淮都轉運鹽使司詳稱：據泰州分司富安安豐等場竈戶陳昆等百餘人連名呈稱：鹽課乃九邊之命脈，竈戶係鹽課之根原。自國初以來，抽民作竈，撫竈當煎，苦骨勞形，輸課供邊，竈戶之苦百倍於民。除力供正課之外，餘鹽貨商覓利養生，二百餘年，肅然無議。蓋自萬歷二十六年夏季以前，每鹽一桶賣銀一錢五六分，尙不堪命。猶有流移，詎自二十六年秋季及今，每鹽一桶止貨銀七八分，尙無商人下場買補，以致商竈惶惶束手停煎，擁器待斃。商人不買鹽，則竈戶無日食，竈戶不煎鹽，恐邊帑日空虛，商人囊資可改別圖，竈屬版籍，何謀立命。故業荒蕪，恐將來不止於流竄隱微之禍。事在難料，念昆等旣生逢太平全盛之時，雖草木昆蟲無不瞻恩被化，矧竈亦係赤子，奚忍坐棄不爲亟處。懇俯輿情，備陳疏豁，上裨國計，下撫逃亡等情。據此，除本司多方揭示撫慰，各安生業，及諭內商照常下場支買外，爲照通泰淮三分司所轄豐利等三十場，南北延袤千餘里，其間竈丁不下數百萬，歲供國課邊儲，全賴若輩煎辦。頃緣時事紛更，引鹽壅阻，商心解體，自去秋以迄今春，皆不下場支買，衆竈餘存火鹽，卽欲賤賣，亦無所售，坐是羣竈束手停煎，枵腹待哺，在富而稍知禮法者，安心營活，固無可虞。在貧而愚悍者，勢必糾黨興販，苟延旦夕。所在官司，非不嚴加禁捕，第慮海濱之竈，素稱梟獍，其中不逞之徒，釀禍蓄亂，殊爲隱憂。業奉本院頒發憲示撫慰，而羣竈猶然喧



閔泣控不已。合無候詳示日。備行三分司各掌印官。務要親詣各場。督率場官。宣布本院爲國爲竈德意。必不使顛連無告。以安萬竈之心。以消未萌之患。庶羣情旣慰。而禍變可彌矣。等因到臣。據此。先據陳昆等赴臣泣訴前情。隨經出示安撫去後。今據前因。除批行督令三分司掌印官。遍歷各場撫諭外。該臣看得當鹽政紛亂之初。臣止恐邊引不行。軍儲告竭。必爲國家將來之害。尙不意其深憂顯禍。卽在目前。有如此之速且甚也。粵考國初抽民作竈。徙居沿海。專供煎辦。每竈丁煎鹽一引。給以官鈔。值銀二錢。以供養贍。此外並不許私煎私賣。爲禁甚嚴。厥後鈔法不通。竈難存濟。而餘鹽之議始行矣。餘鹽者。乃竈戶辦課之外。煎有餘贍。鹽斤聽商收買。增入正引。照例掣賣。在商人則納餘銀以濟國。在竈戶則賣餘鹽以贍生。此公私兼濟之道。商竈兩便之術。其在今日。必不可得而易者也。自前歲田應璧之疏一行。商衆驚惶。咸思徙業。見在堆鹽。尙難發脫。更無復肯下場收鹽者。夫竈丁生居海畔。灌莽千里。五穀不生。止靠煎贍。餘鹽易食餬口。今餘鹽一日不售。則竈丁一日絕食。此輩癡如鹿豕。狠同豺虎。貪生念重。法紀安知。萬一蠢動。何以制之。如近日瓜洲之事。嘯聚數千。幾成大變。念之殊可寒心也。臣雖日移惠竈之文。但彼方枘腹絕食。旦夕莫必其命。闔室待斃。老幼不保其生。此何等時勢。而可以空文慰撫之。臣雖日出招商之示。但榷稅者。概及於引鹽。旣已星羅碁置。投獻者。並估其資產。何異割骨剜心。此何等光景。而可以告令招致之。夫利者。小民所共欲。而商人則趨利之尤者也。國家經理鹽課。以裕邊儲。不過順其欲利之心。因其樂趨之勢。立爲法制。以整齊之。稽其壅弊。以疏導之。如是已耳。非能強之使來心。今朝廷之法紀旣乖。則



商人之手足無措。刻剝太至。是皆行道之人。掉臂而去。孰肯涉風波。損資本。以甘蹈不測之禍哉。臣卽多方曉諭。百計招安。但事柄旣已潛移。憲令止爲空設。商有耳目。誰肯信從。故見今京掣之期。已踰五月。水商不肯買捆。則內商之餘銀無出矣。內商不肯收鹽。則竈丁之生理已絕矣。不惟遠之害貽於疆場。且恐近之變生於肘腋。迨之盜賊蜂起。疆場鼎沸。然後奸究因而乘之。卽有撥亂反治之思。吁嗟無及矣。臣力旣不能挽回。心尤不忍坐視。此所以食不下咽。寢不甯席。而不敢不以上聞。非故爲此過激之談。冀以聳動聖聽也。伏乞皇上惻然深念。將臣疏敕下部院。詳加勘議。事情關係。是否重大。邊海隱禍。是否當防。商人解散。作何招徠。竈戶窮迫。作何安集。從長議覆。請自上裁。庶封疆免擾攘之禍。而臣亦得以追失職之誅矣。臣無任激切待命之至。

是書凡三卷三十四篇。馬介愍公家藏本也。四庫採進本無卷數。提要謂蘭臺奏疏。明馬從聘撰。從聘有四禮輯宜。已著錄。是集爲從聘所自編。凡二十六篇。與家藏本殊爲歧異。而所稱自序刊題。時地與此正同。計是書前二卷。適合二十六疏之數。蓋公原編也。自序云。疏草若干首。不標卷數。足以爲據。末卷乞裁察無沒官鹽以下八疏。蓋後所續刻。併前釐爲三卷。採進本乃其初刻。故不分一二卷之目。非有闕佚刪汰。閱者可無疑焉。案公序。並刻者有綸音錄。今無傳本。區區是編。歷數百年。巋然獨存。豈非英風義烈。有不可磨滅者歟。光緒十三年丁亥四月十三日。王灝謹識。







編主五雲王

編初成集書叢

疏 奏 臺 蘭

發  
行

印

國立中央圖書館

書 碼 652.1  
6395


登錄號碼 101505



國立中央圖書館



0101505



譜